



泰山道里記






叢書集成  
初編

主編者  
王雲五

商務印書館發行



泰山道里記



3 0646 4509 0

聶欽纂

本館據藝海珠塵  
本排印初編各叢  
書僅有此本

# 泰山道里記

清 趙 欽 纂 欽字劍光 泰安人

余生長泰山下。嘗蒐討岱故。更思以游屐得其實。乾隆癸亥。安邱劉履夫。其旋教授泰安。與余善。每同遊幽躋險探。稽往躅。戊辰春。車駕東巡。常事屬履夫。輯御路古蹟。隨筆泰山紀略。脫稟授余。後履夫除知定縣。卒官。余亦卜居山中。歲庚辰。有仁和成城衛宗者。來纂泰安府志。訪獲紀略。亟加歎賞。因請補遺。後別刻泰山勝槩志一卷。竝多采紀略。然其中有一地兩稱。或名同地異。巖谷險阻。向有題刻。惜為苔蔽。莫辨者。近迺豎梯。親加刮磨。以覈之。雖風雨寒暑。弗憚其勞。而又質之野老。參考羣書。竭半生精力。爰彙為一編。提挈道里。為綱領。分之為五。合之為一。名曰泰山道里記。凡古蹟祠宇橋坊。悉綴其下。他如高里。徂來。云亭諸山。皆支峯別阜。石汶。北汶。三谿諸水。同歸於大汶。再靈巖。琨瑞川。各名蹟。連屬嶽之極北者。雖異縣。何妨兩載。而泰山全體著矣。之數者。庶幾補前人諸紀所不逮。亦欲使後之遊者。易攷焉。惟是管窺所及。文詞鄙拙。復芟蕪較訂。自乙酉迄壬辰。四易藁而始定。非敢謂記之成也。聊以自娛。山居云爾。 趙 欽 書。

泰山。虞書謂之岱宗。風俗通義曰。岱者長也。萬物之始。陰陽交代。白虎通德論曰。東嶽為岱宗者。言萬物之相代於東方也。又嶽之為言。桷也。桷考功德。定黜陟也。禹貢謂之岱。周禮謂之岱山。爾雅論語謂之泰山。是泰山之名。後於岱也。

泰山道里記

083  
1124  
2:3002

51297

泰山結體。惟魯頌巖巖一語足以形容氣象。後人謂泰山如坐者。言一山之體也。又曰泰山爲龍者。言衆山之奔赴也。舊說皆謂山脈自西而東。鄭樵通志謂濟南諸山其北麓。兗州諸山其南麓。青齊海上諸山其左翼。河東諸山其右翼。終不言其脈之所起。李光地禹貢注導山四條。惟第一條言入海。餘三者或長或短。率無入海之文。且皆爲嶽宗。用表徐青之畛。迤東卽其入海處。經文不及。以是蓄疑。曾因奏對。備聞山東諸山之脈自營州跨海而來。遣官按履。經十餘年。非意之也。蓋自聖祖御製泰山龍脈論出而百家息喙矣。

泰山而西南。杜氏通典之說也。後人多謂南向。蓋登山者皆由紅門一路。適值其南。於此仰望。峯巖掩蔽。不見絕巔。惟自山西南視之。則正而出矣。亦足徵其非自西來也。其背依東北。棨戟排列。最據形勝云。秦山道里見於載籍者。博聞錄謂高四千丈。環一千里。茅君內傳謂周回三千里。其說荒遠。不可稽。唐徐堅初學記引漢官儀及泰山記曰。自下至古封禪處。凡四十里。晉郭璞山海經注謂從山下至頂。四十八里。三百步。唐六典謂周百六十里。高四十餘里。故俗皆以爲四十里云。然登山者寅上而未下。度其時在平地。僅行六七十里而已。況攀陟爲勞。不足四十里明矣。明萬曆間。有參政張五典者。嘗立一法量之。其法用豎竿一。長一丈。刻以尺寸。竿端置一環。用橫竿一。長亦一丈。中置一環。兩端皆五尺。取其輕重相稱。以繩繫於橫竿之環。而又穿於豎竿之環。牽其繩之尾。則橫竿可上可下。而不失其平。於是以豎竿所立之處視橫竿所至之處。則五尺爲一步矣。此以量其遠近也。每量一步。若在平地。則橫竿由端以至豎竿

前後俱著於地。若前高而後下。則橫竿前著於地而後懸於空。視竿所懸處至地尺寸若干。此以量其高下也。又備一冊。每葉畫三百六十格。每量一步則填一格。平地則於格內填一平字。其高尺寸若干。亦於格內注之。填盡一葉。則尺三百六十步爲一里。其高則累尺寸而計之不爽也。由山下至絕頂。凡量四千三百八十四步。而紆迴曲折皆在其中。高三百八十六丈九尺一寸。中除倒盤抵十八丈五尺七寸。抵高數外。實高三百六十八丈三尺四寸。折步七百三十六步六分八釐。平高共積五千一百二十步。有奇。實一十四里零八十餘步耳。

泰安府城舊爲岱嶽鎮。自漢迄南北朝。置奉高縣。爲泰山郡治。在今治東北四十里。其時兼攝博縣。在今治東南二十五里。隋開皇時。改奉高曰岱山。大業初。省岱山入博城。唐高宗改名乾封。宋太祖開寶五年。詔遷治就嶽廟。眞宗祥符元年。改名奉符。屬襲慶府。金初爲泰安軍。尋改泰安州。治奉符縣。元因之。明初省奉符。歸併歸泰安州。屬濟南府。國朝雍正十三年。升州爲府。轄州一縣六。倚郭爲泰安縣。其城內外祠觀名蹟。有關泰山掌故者。竝備錄之。

府城內西北爲岱廟。水經注引從征記曰。泰山有下中上三廟。牆闕嚴整。廟中柏樹夾兩階。大二十餘圍。蓋漢武所值也。門閣三重。樓榭四所。壇一所。按此廟蓋下廟也。其制初爲遙參門。門與城南門相直。其前卽宋眞宗警蹕之地也。門外爲臺。上起石坊。乾隆三十五年。奉敕增建。額遙參亭三字。北爲遙參亭。亭一名草參。凡有事於嶽者。拜於亭而後入。是爲入廟之始。自明人設元君像於亭中。遂與廟隔。不可通輦路。

矣。亭後爲岱廟坊。康熙間。布政使施天裔。剏建。北爲廟城。堞方三里。高三丈。門八。南關者五。中曰正陽。三十五年。奉敕重建。額岱廟二字。東西兩掖門。東掖之東曰仰高。西掖之西曰見大。東一曰青陽。又名東華。西一曰素景。又名西華。北一曰魯瞻。又名厚載。門各有樓。又四角亦皆有樓。曰巽。曰艮。曰乾。曰坤。各隨其方焉。由中門而入。北爲配天門。其東爲三靈侯殿。又東爲炳靈殿。文獻通考。後唐長興三年。詔以泰山三郎爲威雄將軍。卽此。大中祥符元年十月。封禪畢。親幸加封。令兗州增葺祠宇。又於廟北壩建亭。名曰靈感。肖像一男一女。亭圯。移像於後寢宮。今乃建祀於此。按俗刻增補搜神記。引唐會要云。泰山有五子。某某。三曰至聖炳靈王。配永泰夫人。一女曰玉女大仙。卽碧霞元君。其說妄誕不足據。殿前漢柏六株。老幹扶疎。有明陳昌言漢柏圖讚。西北隅一株兩幹。乾隆二十七年。御製漢柏圖詩。碑陰勒詩一首。并建亭於殿西。其殿南乃宋孫明復初闢學館處。名曰信道堂。併自爲記。金黨懷英魯兩先生祠碑云。孫石兩先生講學舊館。爲岱廟所併。猶名爲柏林地。歲分施錢爲養士之費。今則盡歸道士矣。其門外有宋宣和宇文粹中撰修廟碑。炳靈殿北舊爲迎賓堂。有司侯王人之所。康熙間。增置三茅殿。乾隆三十五年。改建駐蹕亭。配天門。西爲太尉殿。朱佐前定錄補所謂幽公杜琮也。又西爲延禧殿。今竝祀三茅於內。集仙傳所謂東嶽上卿漢茅盈。及弟茅固。茅衷也。殿前有元聖旨。泰定鼠兒年。至正猴兒年碑。及杜翱撰東嶽別殿重修堂廡碑。竝亡。中階唐槐一株。古幹中劈。蔭覆半畝。有明人甘一驥大書唐槐二字碑。其門外有宋祥符晁迥撰加封碑。延禧殿北舊有御香亭。爲貯御香之所。有誠明堂。爲祭官齋宿之所。竝圯。西爲環咏亭。四



垣嵌歷代石刻百餘。計種放題跋其尤也。明萬曆間重建。乾隆十二年拓新之。今上東巡謁岱廟。四陟岱巔。嘗駐蹕於此。有御製環咏亭詩三首。勒亭壁。北爲藏經堂。內貯歷代經文典誥。東爲魯班殿。殿前有乾隆三十五年内務府大臣劉浩資帑重修泰山神廟告竣題名碑。配天門北爲仁安門。門前有國朝告祭碑十三。修廟碑一。左右環立。門內東西碑亭二。碑臺四。其在東者金大定楊伯仁撰重修廟碑一。明告祭碑六。國朝告祭碑五。御墨亭碑一。今上御製重建廟碑一。其在西者宋祥符楊億撰天貺殿碑一。明初詔去封號碑一。告祭碑五。天順間薛瑄撰修廟文竝勒天貺殿碑。後面國朝康熙間施天裔修廟碑一。告祭碑一。又有石幢一。制最古。通蓋跌高可二丈八。而剝蝕無字。俗以無字碑呼之。而宋宣和襲慶守錢伯言紀游碑。陰勒明鄒宏文跋。嘉靖間李欽撰修廟碑及明代諭祭各碑。悉爲工人徹毀。中爲石欄。欄內外怪石凡九。皆有題勒。北爲露臺。臺之上屹然中立者曰扶桑石。挺然北向者曰孤忠柏。廟內階旁有古檜數十。蟠結杈枒。此卽從征記所稱漢柏夾兩階者。其餘翠柏森列。惟露臺西南二株附枝倒垂如綴。皆施天裔修廟時所植也。露臺東西雙井夾之。西井味尤甘美。有明州人李欽古井記。朱之蕃詩稱香井是也。又有鐵桶二。大數抱。宋建中靖國元年造。有奉符縣人李諒題記。周以迴廊。各繪冥司善惡狀。東廊中間爲鼓樓。樓後有東齋房。圮。西廊中間爲鐘樓。樓後有神器庫。從征記曰。庫中有漢時故樂器。及神車木偶。皆靡密巧麗。又有石勒建武十三年永貴侯張余上金馬一匹。高二尺餘。形制甚精。是其地也。北有西齋房。今竝亡。露臺北爲峻極殿。卽宋之天貺殿。殿九間。重簷八角。祀泰山之神。唐元宗開元十三年。封齊天王。宋

真宗大中祥符元年。加封仁聖天齊王。四年。詔加上天齊仁聖帝。元世祖至元二十八年。加封天齊大生仁聖帝。明太祖洪武三年。改稱東嶽泰山之神。國朝吳雲聯曰。帝出乎震。人生于寅。康熙二十三年。聖祖仁皇帝躬祀於此。賜額曰。配天作鎮。雍正九年。世宗憲皇帝額曰。岱封錫福。乾隆十三年。今上躬祭。額曰。大德曰生。十六。二十二。二十七。年。上皆親祭焉。三十六年。上復親祭。賜玉圭一。高三尺五寸。寬八寸。色微青。有御製岱廟詩六首。竝勒殿前東西碑亭。後爲寢宮。宮五間。宋大中祥符五年。册封東嶽淑明后。今上額曰。權輿造化。東西曰配寢。凡岱廟之廢興可考者。自宋迄國朝。皆相繼增修。碑具在。出府城北門外一里。爲岱宗坊。登岱者自此始。坊創於明隆慶間。巡撫姜廷頤。總河翁大立。巡按羅鳳翔等。圮。雍正八年。郎中丁皂保。赫達塞。奉敕重建。篆書坊額。西南爲鳳凰臺。漢書。宣帝元康元年。鳳凰集泰山。後因其地爲臺。臺上覆以亭。廢。猶有土邱石柱。乾隆十二年。爲工人掘土所毀。坊東爲酆都廟。神稱酆都大帝。配以冥府十王。道經云。酆都爲陰氣之主。九地之樞機。又曰。十王之中。七曰泰山。故祀此。今上額曰。現因果法。墀下有古柏。柏頂寄生檜一株。根枝鬱茂。俗呼飛來柏。廟始於明宏治十四年。太監李瑾建。有嘉靖四十一年。李欽撰重修碑。坊西舊爲升元觀。乾隆三十五年。建行宮於此。有御書體元堂額。向多古柏。今猶存數株耳。

坊北爲三皇廟。祀伏羲、神農、黃帝。配以八蜡。兩廡祀先賢。明宏治間。嘗遣中官致祭。有御祝文碑。今以歲十二月八日致祭。爲郡人蜡祭之所。

北爲升元觀。觀初名建封院。宋政和八年賜額升元。有敕牒碑。元至元二十二年張志純重修。改曰朝元。有徐世隆碑。其神祀東華帝君。俗謂之東嶽福神。此則自西南而徙建者。北爲玉皇閣。萬曆八年建。白鶴泉故道也。按明一統志。懸崖瀉出。宛如垂練。岱史云。泉冽味甘。異於他水。泰山小史云。泉出一天門下一里。水西南流。迨宋初。此城疏泉。瀦繞其下。城北舊有水道。經岱廟東南。出折而西南。曰蓮舟街。至城西南。出會濼河。入泮歸汶。嘉靖間。舉人封尙章。別墅於泉側。引水爲池。曰封家池。凡輜軒讌集。多於此。尙章沒。其家苦於供應。遂用巨釜塞之。復立閣於上。自泉塞後。宋燾以州中科目漸稀。與當事議濬通。竟爲衆所阻。然至今夏秋大雨時。閣旁地中猶隱隱如雷吼。西南有泉一泓。清冽甘美。蓋其支流耳。乾隆十八年。知縣馮光宿建石坊於前。額曰白鶴。西偏別構一亭。二十七年。知縣程志隆拓建西爲北斗殿。隆慶間。建前有人祖殿。祀秦始皇。蓋本史記所云祖龍者人之先也。近改痘神祠。北爲金龍四大王廟。山東通志稱神爲南宋謝緒。行四錢塘人。隱金龍山。宋亡。投茗水死。明天啓四年。以擁護漕河。封今號。康熙元年。祀此有王紀碑。西爲青帝觀。顧炎武謂卽月令所謂其帝太皞也。隋書禮儀志開皇十五年春。行幸兗州。遂次岱岳。爲壇如南郊。又陳樂設位於青帝壇如南郊。帝服袞冕。乘金輅。備法駕。行禮畢。遂詣青帝壇祭焉。按觀創建無攷。宋祥符初重修。加封廣生帝君。有御製碑。今佚。又北爲金山明立高真院於上。今名西眼光殿。殿西有眼光泉。遊人多於此掬水洗目。自大王廟轉而東北爲后土殿。有宋范致君題名。勒壁門外。有井曰滌塵泉。東爲老君堂。古岱嶽觀之一

隅也。唐爲老氏築宮。武后賜額曰白鶴。自高宗以下六帝一后修齋建醮皆於此觀。有雙碑以蓋趺合而束之。俗呼鴛鴦碑。其字四面。每面作四五層。書法不一。唐碑存於泰山者唯此與元宗紀泰山銘耳。顧炎武采入金石文字。迤南。嶠基敞豁。皆岱嶽觀故地。按水經注曰。古帝升封設舍所跨處有石竅存焉。在故觀南趾。從征記曰。中廟去下廟五里。屋宇又崇麗於下廟。廟東西夾澗。岱史載向尙存古松柏十餘株。有趙子昂題刻漢柏二字。今與樹俱亡。是岱嶽觀在元以前爲東嶽中廟矣。東爲翠玉庵。祀王母。宋皇祐間鍊師龐歸蒙輩居此。賜紫服。題名於石。後人增置藥王殿觀瀾亭。石渠夾徑。建以橋欄。庵前有飛鸞泉。又東跨澗。古有王母橋。今廢。旁爲呂公洞。唐雙碑。韋洪詩謂之發生洞。宋錢伯言紀遊謂之金母洞。傳純陽子煉丹於此。內有純陽石像。上爲飛虬嶺。宋熹泰山紀事曰。昔呂公題詩石壁。有虬常對詩頂禮。一夕呂公復至。揮筆點其額。遂化龍飛去。因名飛虬云。按岱史。呂公於紹聖政和間題詩二首於王母池。卽此。其遺刻在今府署南關帝廟壁。嶺上舊有巖巖亭。金知州姚建榮建。并自爲記。明成化間。參政張盛移建於水簾洞東。亦亡。洞北爲虬在灣。卽岱史所謂王母池。一名瑤池。水經注。古者帝王升封。咸憩此水。是也。按宋李諤記稱昔黃帝建岱嶽觀。遣女七人。雲冠羽衣。修奉香火。以迎西王母。其說荒遠不可稽。然老君堂雙碑載唐人題名。有拜訪瑤池之語。知其久也。上有王母樓。俗稱梳洗樓。圮。以中溪經流繞府城東南。遂名梳洗河。山海經所謂環水也。有環水橋。明舉人張虎建。又南過封祀壇。東則河淤伏流。至木頭溝復見。入泮歸汶。總名中谿也。虬在灣北。石厂森陰。谿水環澗。泰山紀勝謂之小蓬萊。爲工人采石所毀。崖西猶

有巡山李元英等及巡山孫明叔等題名。皆無朝號。又唐雙碑內刻宋人題名。有巡山供奉何懷智。巡山侍禁李安二官名。并攷飛虬嶺東爲虎山。其上有東眼光殿。雍正八年建。遙與西眼光對峙。

玉皇閣北爲關帝廟。康熙乾隆間相繼拓修。今上額曰神威巨鎮。廟東有憩亭及露井。

北爲一天門坊。明叅政龍光題。康熙五十六年巡撫李樹德重建。自岱宗坊至此四里。是入盤道之始。凡坊皆跨道。遊者經其下也。

北一坊明羅洪先題曰孔子登臨處。孔子登泰山見於孟子、列子。而其駐足之地則誰其見而識之者乎。西爲合雲亭。雍正三年知州吳曙建。有今上賜亭額。

北爲天階坊。明巡按高應芳題。

北爲元君廟。元君有上中下三廟。此其中廟也。旁有且止亭。明天啓六年僧興旺拓建。知州于可久記。康熙間建紅門坊於前。額曰瞻巖初步。爲登岱者衆路之會。

北爲觀音閣。舊名飛雲。今上額曰普門圓應。東爲更衣亭。凡士夫登岱者。至是易便服以行。今改彌勒院。其南別構一亭。東北爲黑石埠。草木森蔚。谿內片石如几。曰小洞天。下有灣曰柳條。飲馬石。各隨地命名。大澗皆然。漢枚乘謂泰山之盤穿石是也。東爲箭竿峪。水南流逕虎山北。又東南繞明尙書蕭大亨先塋側。匯水爲石馬灣。過岱道村。呂仙橋。入梳洗河。村中有呂仙祠。萬曆間建。宋巖記碑。

元君廟西北爲大藏嶺。自東趾至巔。有石屋各一。其南丹壁懸崖。則所謂紅門也。西爲垂刀山。宋時得天

書於此。西爲鄆都峪。俗名鬼兒峪。水南流。逕金山北。又西南入濼河。

觀音閣北。跨道爲萬仙樓。舊稱望仙。明萬曆四十八年建。上祀王母。配以列仙。中爲元君。今上額曰景會。翠真。下爲隱真洞。其東澗水潑紆。匯爲碧泉。夾澗多櫻桃。蓁竹。曰櫻桃園。古詩冉冉孤生竹。結根太山阿。今可見者惟此。與普照寺嶽東北竹子園耳。北爲桃源峪。或謂之桃花澗。前人題刻紛紛。惜唐代題名已鏤毀。猶有時十月張鍊師因拜岳大曆八年十數字可識。

北爲蘊亭。順治十六年建。爲遊人憩息之所。圯。

北爲斗母宮。古龍泉觀也。明嘉靖二十一年德藩重建。濟南陳軻記。

北爲高老橋坊。自一天門坊至此五里。北卽高老橋。古有高老創開此道。故名。有嘉靖三十九年副使高捷重修橋碑。其旁有龍泉水。從西北山峽經此。東注中谿。

橋北山勢突起。明置人祖殿。今改三官廟。東北里許。有漱玉橋。圯。爲砲高嶺。爲石經峪。宋陳國瑞題名。石經谷。石坪廣畝許。古刻隸書金剛經於上。字大如斗。不記姓名。年號殘毀過半。明王世懋輩疑爲宋元人筆。而無所指實。按北齊武平時。梁父令王子椿好內典。嘗於徂來山刻石經二。俱隸書。字跡古勁。與此如出一手。則是經。或亦子椿書耶。隆慶間。侍郎萬恭云。近人刻大學聖經於上端。以勝之。今佚。汪坦刻詩般一章。在焉。北爲水簾崖。多題識。稍西。石壁中分曰仙峽石。又名試劍石。萬恭磨壁爲記。并建石亭。額曰高山流水。亭西上舊有聽雨軒。轉而東爲龍泉峯。又曰棗栲嶺。石經峪水出焉。上接三叉溝。遶峯後。又西南

注中谿

三官廟北爲水簾洞坊。自高老橋坊至此三里。一澗深廣。有橋跨之。曰住水流橋。西北一里爲天紳巖。山坳古洞出水。卽水簾洞。危壁飛瀑。名曰水簾泉。東注中谿。

水簾洞北爲登仙橋。東折而上爲歇馬崖。亦曰馬棚崖。言崖可屋馬也。岱史云。向有墨書三畫。風雨不滅。傳爲呂仙蹟。故又名三字崖。大學士郡人趙國麟詩曰。一澗空中落。雙崖勢欲連。崖忽傾落。趙復題云。高岸已夷陵。谷變後來休。笑畫圖虛。西北爲雲頭埠。峯巒纒起。烟雲中望之。若人立。或若獸蹲。其南有地名曰白楊坊。多白楊樹。石厂幽杳。額曰白楊洞。祀彌勒石像。有泔池水。西南流。逕凌漢峯後而下。匯爲碧油灣。水碧于油也。俗呼香油灣。入西谿。

歇馬崖北有聖水泉。跨道。殿閣鉅麗。卽明嘉靖昇仙閣趾。乾隆十二年拓建。改名壺天閣。今上駐蹕於此。有御書閣額及御書壺天閣詩三首。勒東北崖。西偏爲倚山亭。

對閣爲元君殿。今上額曰瓊霄珠照。

北爲玉皇廟。今上額曰紫垣凝命。

其上盤巖疊嶂。爲迴馬嶺。一名石關。應劭謂之天關。自水簾洞坊至迴馬嶺坊。凡七里。過此馬不能登矣。有御製迴馬嶺詩三首。東西勒崖。嶺迤西爲九峯山。轉而東爲十峯嶺。岱史稱古雲巖。下爲鴈石溝。旁有一石似鴈也。水南流。會石經嶺。

東轉而上爲金星亭。西折爲三大士殿。西北過步天橋有十二連盤。

北爲黃峴嶺。土色黃赤異他處。又名中谿山。迤東有環水南流。中谿發源於此。西折舊有黃峴嶺坊。今圯。再上爲二天門坊。自迴馬嶺坊至此五里。峯迴路轉。是爲登岱之半。有廟祀黑虎。俗呼二虎廟。旁爲虎埠石。巨石蹲踞。此虎西南可覽傲來。北有倒三盤。

北爲快活三路。凡三里。差不磊嶮。行者快之。一名快活山。旁有玉液泉。石穴迸水。北爲跨虹橋。

自北而西爲增福廟。爲元君殿。西北舊有迎天坊。圯。北爲龍文石。文理盤旋若龍。一名蛟龍石。北爲迴龍橋。

北爲小龍峪坊。圯。其西卽小龍峪。石峽飛泉。勢若龍噴。東崖兩石谿。中噴清泉。曰小龍口。西北爲欄住山。以壘嶂橫抵谷口也。其上爲弄月巖。有半山亭。故陞下爲潛龍澗。水西南流入黃西河。

又北而西。過雪花橋。再上爲三蹬崖。平處三里。至此又復嶽崎。側一石鐫明徐用檢禱雨靈應歌。東爲御帳坪。片石坦豁。爲宋眞宗駐蹕處。有石竅存焉。前爲飛瀑巖。瀑水懸流。若濺花鋪玉而下。曰護駕泉。又名銀河。聖祖仁皇帝御製百丈崖觀濤詩卽此。坪北舊有五大夫松。史記秦始皇登泰山。中阪遇暴風雨。休大樹下。因封其樹爲五大夫。漢書但云大樹。不云松也。初學記引漢官儀及泰山記云。小天門有秦時五大夫松。現在。蓋漢人實見其松也。泰山紀事。松舊有二株。蒼秀參天。四圍碧石。欄根無土。蟠於石上。萬曆三十年。泰山起蛟。遂失松所在。以爲化龍去。按五大夫樹。唐陸贄稱爲五株。今新栽五松。有坊額曰五大



夫皆好事者爲之。坊卽小天門。岱史稱誠意門。自二天門坊至此五里。坊側巨石屹立。相傳萬曆三十一年夏。自山巔墜此。因名飛來。有柯紹臯題識。西崖勒今上御製飛來石詩。岱史云。誠意門西爲公署。東爲五松亭。又名憩客亭。明人重建。題曰御帳遺蹟。今俱亡。東有望駕石。如人拱立。又東一山曰老人砦。有朗然子洞。元初劉朗然修道處。下爲三叉溝。會雙溝而西南流。

五松北凌爲單仙亭。明人篆亭名於崖。兩崖夾徑。勒今上御製五大夫松詩二首。

西上爲朝陽洞。坊自五大夫坊至此一里。

北上爲凌虛閣。圯。西爲振衣亭址。乾隆十二年改建。駐蹕亭於此。有御書勝覽方輿額。迤東別構望松亭。尋圯。

北爲元君殿。今上額曰靈府慈光。

北卽朝陽洞。深廣如巨屋。南闢向日。舊名迎陽。亦曰雲陽。朱衡更名朝陽。東爲御風巖。磨勒今上御製朝陽洞詩。因名萬丈碑。字徑三尺。又詩二首刻於洞東石壁。洞北一松獨挺山崖。曰處士松。有明方元煥題識。塗澤民碣曰。獨立大夫。治中州人。蕭協中。泰山小史云。萬曆三十一年一夕風雨。失其樹。惟碣存焉。其曰處士曰獨立。蓋秦封也。按此一大夫孰爲封與。

北爲對松山坊。自朝陽洞坊至此四里。兩峯夾路對峙。蒼松踞焉。曰對松山。亦曰萬松山。松厄於石。不能大雨不常及。以雲氣沾溼而生。且茂枝皆作蛟虬狀。風謾謾。清人脾。過聖水橋東。崖勒今上御製詩二首。

詩云。岱嶽最佳處。對松真絕奇。稍北舊有大悲殿。今上額曰。蓮界慈航。西有乾坤樓。明洪朝選建。圮近改新盤於橋西高阜上。或謂之雲門。

北爲龍門坊。舊額大龍峪坊。自對松山坊至此四里。坊東卽大龍峪。衆水歸峽。飛泉若瀉。舊有龍王廟。上有金母殿址。北曰雞冠峯。片石懸立於上。翔鳳嶺南巖也。轉而東爲新盤口。有度天橋。明萬曆間參政呂坤建。令登岱者上從東而下從西。無相踐蹂。蓋仁人之用心如此。竝圯。南有雁翎峯。尖峯峭出。蓮花峯下趾也。北上崖縫吐水曰大龍口。宋邵伯溫所謂龍口泉。大石有罅如龍哆其口。水自中出也。

北爲石壁峪。兩山竦削壁立。東曰飛龍巖。西曰翔鳳嶺。中爲十八盤。有昇仙坊。自龍門坊至此三里。攀躋直上。天門忽闕。其相距一里餘。按後漢書注。應劭漢官馬第伯封禪儀記曰。俛視谿谷。碌碌不可見丈尺。遂至天門之下。仰視天門窅邃。如從穴中視天。直上七里。賴其羊腸逶迤。名曰環道。往往有緝索可得而登也。兩從者扶挾前人相牽。後人見前人履底。前人見後人頂。如畫重累人矣。所謂磨胸捩石捫天之難也。初上此道。行十餘步一休。稍疲咽唇焦。五六步一休。蹠蹠據頓地。不避溼闇。前有燥地。目視而兩腳不隨。劭所述極登陟之狀。後易以鐵索而盤皆密級。不必十餘步一休矣。有今上御製登岱詩一首。度十八盤詩二首。勒東巖。

十八盤盡處爲南天門。舊稱三天門。劭所謂天門也。其上有閣曰摩空。自是朝天有路矣。門外西側有自然碑。高六尺三寸。寬四尺八寸。不加磨礱。因石勒元天門銘。杜仁傑撰。嚴忠範正書。字徑二寸。銘辭古雅。

書法端嚴。一佳刻也。今卽其地築臺。而是碑遂瘞。門內舊爲三靈侯祠。通志稱周諫官唐宸、葛雍、周武也。宋眞宗東封泰山。見三神人於天門。因加封建祀。後改置於鳳凰山。圮。遂移鳳凰山之關帝廟於此。今上額曰乾坤正氣。應劭曰。早食上晡。後到天門郭。使者得銅物。形狀如鐘。又方柄有孔。莫能識。疑卽封禪具也。杜仁傑天門銘序曰。泰山天門無室宇尙矣。布山張鍊師爲之經構。累歲乃成。可謂破天荒者也。按張志純號天倪子。隱布山。在今治西南八十里許。

南天門西爲月觀峯。西偏怪石攢簇。卽漢官儀及泰山記所謂山頂西巖爲仙人石閭也。兩石環立如屏。名曰西天門。下爲上桃峪。桃花峪源也。西注混源池。中一石卓立爲君子峯。又南爲西神霄山。或謂之兩峯巖。雙峯峻特。峽口有臥馬峯。渠水南流。至對松山。東注龍峪。

關帝廟東北有石坊。明人題曰升中。今廢。

東爲天街。廡而市者可三十家。劭所謂東上一里得木甲。木甲者武帝時神也。是其地矣。迤北爲行宮。乾隆十二年建。有御書雲巢額。今圯。按此地舊稱五賢堂。祀孟、荀、揚、文、韓五子。相傳爲蘇源明讀書處。又有肩吾軒。石林館。皆其故址也。西爲萬福泉。泰山小史云。石穴涌流。甘冽異凡。時中貴汲以羞上。賜名萬福。遊人掬之洗目。謂可卻病。稍北爲避人厂。幽僻可棲。

自天街北爲鳳凰山。其前舊有蓬元坊。明人建。按名山洞天福地記。第二洞東嶽泰山。周迴一千里。名蓬元之天。此坊之所取名也。南有白雲洞坊。萬曆間巡撫李戴建。圮。西爲象山。爲鎖雲巖。又名雲窩。卽白雲

洞有今上御製詩勒壁。然洞頂東北坦處有亭有軒。皆額曰雲。李戴記石並忘。洞南深谷陡峻。或稱百丈崖。水西南流入石壁峪。轉而東爲砧子石。南爲蓮花峯。五峯攢簇如蓮花。花厓寬平。亦絕類蓮實。迤東危崖萬仞。岱史所謂五花崖。仰視不見絕巔。崖蔽之也。登之視盤道中人往來雜遝如蟻。俗又呼望人峯。峯頂有試心石。二石鉤連於上。登之動搖。或曰惟心誠則不動。迤南有神泉。馬第伯記云。飲之清美。利人。溝水南流達於滌慮谿。經對松山而西注龍峪。

鳳凰山東爲圍屏峯。卽岱史懸石峯也。舊有老君堂。圯。東偏爲虎頭崖。巨石狀如臥虎。南折轉東爲避風崖。石厂深密而向陽。宋人題刻殆徧。東北有萬壽殿址。泰山小史稱萬壽宮。又有御香殿。亦曰御香亭。萬曆四十二年建。祀九蓮菩薩。並造大銅鐘。一上有御製鐘讚。崇禎十四年復增祀智上菩薩殿。久圯。移像於青帝宮。置鐘於後石屋。按二后升祔時。先後建祀岱巔。竝置祀山下天書觀內。東爲鬪仙巖。多宋元題名。明人大書振衣岡三字。錢毀過半。上有魯班洞。稍北有萬曆時所築北斗壇。四面皆門而中通。上復爲臺。曰禮斗。碧石並峙。多文采。俗呼輔弼二星。取泰山北斗之義也。又東。巨石黑麗。上鑄天柱峯三字。下有宋劉袞馬熙題名。東北崖石竅滴水如貫珠。曰珍珠泉。晝夜出斛許。味極佳。迤南有明置西宮署。額曰仰止亭。凡達官止宿恆於此。今亡。

東爲碧霞祠。元君上廟也。文獻通考。泰山玉女池在太平頂。池側有石像。泉源素饒而濁。宋真宗東封。先營頓置泉。湍涌上徙升山。其流自廣。清泚可鑑。味甚甘美。經度制置使王欽若請浚治之。像頗摧折。詔皇

城使劉承珪易以玉石。既成。上與近臣臨觀。遣使齎石爲龜。奉置舊所。令欽若致祭。上爲作記。按古玉女池屬大開祠基。適掩於正殿龕座下。今祠東有聖水井。西有玉女池。并建亭遺跡。皆後人傳會耳。岱史云。宋建昭真祠。金稱昭真觀。明洪武中重修。號碧霞元君。成宏嘉靖間。拓建額曰碧霞靈佑宮。按元君之祀。傳述不一。其以爲黃帝所遣玉女者。瑤池記也。其以爲泰山神女者。博物志也。明人崔文奎獨有取於坤道成女之說。蓋謂岱嶽毓神。上通乾象。降靈下土。故曰天仙玉女碧霞元君。於義吻合。而劉禹錫送東嶽張鍊師詩云。久事元君住翠微。是在唐時已有元君之名。蓋由來久矣。祠正殿五間。像設及蓋瓦。鷓鴣簷鈴之類。皆範銅爲之。其玉像不知毀於何時也。欄其東一間曰東寶庫。西一間曰西寶庫。用以投儲諸所捐施。名曰混施錢。蓋卽漢武時所謂梨棗錢也。自乾隆二十四五年以來。每遇四月盛會之期。御賜彝器鼎鑪。瓊璫多磁晶金玉之屬。舊有玉印。篆刻天仙照鑒四字。或亦祥符時與玉像竝造耶。又有明人郭詔所鑄銅鼓鼎瓶。各識以銘。東西廡設眼光子孫像。瓦皆鐵冶。中爲香亭。卽萬曆建金闕處。有方從哲撰金闕記銅碑。及天啓賜靈佑宮銅碑。又舊有秦篆刻石。先是在玉女池上。後移置祠之東廡。其石高四尺。四面廣狹不等。載始皇銘辭及二世詔書。世傳爲李斯篆字。徑二寸五分。宋人劉跂親爲摩搨。得字二百二十有二。近數年前。摩本僅存。臣斯以下二十九字。末有明北平許口隸書跋。乾隆五年廟災。是碣瘞置失所。明泰山進香題名記。鐵碑銅鼓鼎融爲汁。而玉印獨完。從燼煨得之。惟一角少缺。東西碑亭二。南爲重門。舊額神秀。門前爲臺。綽楔三。向有坊三。北曰護國靈佑。東曰宏仁濟世。西曰聖德安民。萬曆間巡撫

李輔、巡按吳定、韓應庚等建。圮。臺東有鼓樓。西有鐘樓。南爲大門。舊額金闕。國朝順治十八年知州曲允斌重修。復於大門上增葺歌舞樓。東西各築石閣。大門外爲焚帛爐。又曰火池。遠近謁者焚楮幣於此。南爲照屏。康熙五十六年六月六日泰山大水。登岱男女漂流者無算。盤路祠廟皆圮。命江南學政林之瀚。江西學政魚鸞翔重修。雍正七年發帑遣內務府郎中丁皂保赫達塞重修。立碑祠門外。迤東西爲裁革香稅碑。按泰山設立香稅自明始。雍正十三年十二月奉旨永禁。乾隆五年六月二十四日災。命內務府員外郎江都重建。三十五年命內務府大臣劉浩重建。皆有御製碑文紀其事。三十六年五月十五夜泰山水。盤路圮。知府夏玢重修。凡二十四橋皆恢拓之。有戊辰御製登泰山詩二首。刻東亭碑陰。辛未乙酉南巡過泰山詩四首。辛卯登泰山詩二首。並勒祠門外。迤東碑陰碑側。丁丑孟春過泰山詩二首。勒祠門外。迤西碑陰。按明萬曆間王錫爵撰東嶽碧霞宮碑云。庚寅歲。近侍諸臣呂進朝等進曰。兩宮太后聖壽。願往禮嶽祝釐。上許之。乃立石以紀。碑陰有后妃皇子侍臣等題名。其石豐堅瑩麗。自京師置此。然廟災。後是碑尙完整。近爲工人毀壞。殿內先後奉懸聖祖仁皇帝額曰。坤元叶應。世宗憲皇帝額曰。福綏海宇。今上額曰。震維靈嶽。又額贊化東皇。鹽鐵論曰。古者庶人魚菽之祭。士一廟。大夫三。以時有事於五祀。無出門之祭。今富者祈名嶽。望山川。椎牛擊鼓。戲倡舞像。則出門進香之俗。已自西京而有之矣。第四方男女不遠數千里進香報賽。皆先有事於元君而後及於他廟也。

東石閣外爲駐蹕亭。卽康熙中更衣亭。乾隆十二年拓建。岱史稱東公署香稅總巡官所居。皆此地。東南

爲寶藏嶺。上有獅子石。介五花崖。望海石間也。

東北上爲東嶽廟。從征記所謂上廟在山頂。卽封禪處也。元時張志純拓建。明嘉靖間巡撫曾銑重修。布政使陳儒爲記。今上額曰資始惟元。又額上摩蒼昊。廟北懸崖削壁爲大觀峯。一曰彌高巖。有唐元宗紀泰山銘。世謂之磨崖碑。高二丈九尺。寬一丈六尺七寸。額高三尺九寸。寬四尺。開元十四年九月御製八分書并題額。字徑五寸。額字徑一尺九寸。朱彝尊云。碑銘典雅。或是燕許手筆。而御書遒勁若怒猊渴驥。羈束安閒。不比孝經之多肉少骨。若唐隸盡如此。何慚漢碑礪乎。王世貞云。其下三尺許爲搨碑者。冬月篝火蝕之。遂不全。濟南府志碑下截剝落葉彬補書。按彬所補百八字。形似小異。後列從臣題名字。差小好事者以古篆錢毀。猶有開國公臣李仁德上柱國臣李元紘。尉大雅。臣王敬之。三十餘字。空處亦有題名。惟顏真卿題名已亡。其巔有大小懸鼓石。下有桃花洞。裂天泉。雲水池夾之。又唐高宗朝觀碑。蘇頌封東嶽朝覲頌。皆磨於崖。竝佚。康熙二十三年聖祖仁皇帝御製題雲峯二大字。今上御製戊辰二月晦夜宿岱頂詩二首。恭頌皇祖勒崖雲峯二大字詩一首。並勒此崖之西。其上有唐乾封元年劉仁願題記。南側一石。高可一丈。南面刻一拳石三字。北面刻聰明正直四字。孔貞瑄謂之眞泰山。取五嶽眞形之義也。唐磨崖東爲宋磨崖碑。眞宗述功德銘磨勒於上。高二丈六尺。寬一丈一尺六寸。額高二尺八寸。寬五尺五寸。大中祥符元年十月御製正書并篆額。是碑有二。一勒山上。一勒山下。城南其勒山下者。所謂陰字碑也。其勒山上者。文字徑二寸。額字徑八寸。明嘉靖間鄞人汪坦大書東安邵鳴岐等題名一則。又安

陽人翟濤奉當事僚友同遊。引漢陳荀諸賢之象。太史以德星奏一事自爲題名。復書德星巖三大字。並鐫蓋以上每行約毀三四十字。下截尙有字句可讀。共得字二百二十有五。篆額登泰山謝天書述二聖功德之銘十三字。完好如初。原碑字跡猶存。何以孔貞瑄稱只存其額也。文獻通考初王欽若言唐高宗元宗二碑之東石壁南向平峭。欲卽崖成碑。以勒聖製。上曰。朕之功德固無所紀。若須撰述。不過謝上天敷佑。敍祖宗盛美爾。命勒石北向以答天眷。元好問東遊略記云。嶽頂封禪壇下有唐宋磨崖。據此則真宗之述功德銘。先經磨勒。岱巔後又立碑城南也。乃後人第知有城南之碑。而不復知有岱巔之碑矣。西北爲青帝宮。李戴重修。今上額曰。慈天廣祐。東有碧天泉。今涸。大門外巨石踣臥。名曰獨石。西爲後寢宮。明稱神憩宮。女冠爲元君臥像焉。今上額曰。德溥坤輿。西爲望吳峯。俗呼孔子巖。韓詩外傳。孔子望吳閭門外有繫白馬。引顏淵以指之者也。明建過化亭於上。圮。遂立孔子廟於下。嘉靖萬曆間。朱衡、郝大猷、查志隆相繼修葺。奉以四配。後知州秦懋約以非禮徹去。國朝康熙十五年。吳雲、楊霖又重建。礮石爲像。乾隆三十五年。今上額曰。因高喻大。其前有坊。李樹德題曰。望吳聖蹟。廟西有崇岡曰。登仙臺。岱史以純陽嘗登此云。德星巖北爲泰山絕巔。舊稱太平頂。俗名玉皇頂。有玉帝觀。卽古太清宮也。明成化十九年中。使以內帑重建。隆慶六年。萬恭徹觀於巔北。出巔石而表之。觀中有今上額曰。妙運無爲。東側爲迎旭亭。今上額曰。浴日養雲。自南天門至絕巔六里餘。登岱者必以此爲極焉。



絕巔前臺基方廣。碣曰：古登封臺。按漢官儀：秦篆刻石東北百餘步。得北垂圓臺。臺上有壇。謁人多置錢物壇上。亦不埽除。則詔書所謂酢梨酸棗狼籍散錢處數百幣帛具道。是武帝封禪至太山下。未及上百官爲先上跪拜。置梨棗錢於道以求福。壇以南有玉盤玉龜。卽此也。有今上御製登封臺詩二首。勒飛龍巖絕壁。

觀大門外有碑而無字。高一丈五尺五寸。南北面各寬三尺六寸。東西側各厚二尺四寸。碑上微狹於下。頂似幢蓋而趺爲土壑。或曰石表。或曰神主石。或言其下有金書玉簡。當是石函。色黃白。堅瑩無苔蘚。非嶽之所有。世傳秦皇無字碑。然始皇刻石見於史記。二世詔書卽刻其上。不應既有刻石。復立此碑。顧炎武辨爲漢武帝立。東有巨石。勒今上御製無字碑詩。史記封禪書云：上因東上泰山。泰山之草木葉未生。乃令人上石立之。泰山巔。上遂東巡海上。四月還至奉高。上泰山封而不言刻石。是漢石無文字之證。茲碑是也。後漢書郊社志亦云：上東上泰山。乃令人上石立之。泰山巔。注師古曰：從山下轉石而上也。是其證矣。漢官儀曰：石二枚。狀博平圓九尺。此壇上石也。其一石。武帝時石也。時用五車。不能上也。因置山下爲屋。號五車石。今石失其處。封禪書又曰：武帝封廣丈二尺。高九尺。其下有玉牒。書江淮間一茅三脊爲神。藉五色土。益雜封。縱遠方奇獸。蜚禽及白雉。加祠。其夜若有光。晝有白雲起封中。

絕巔東南爲平頂峯。巔石平敞。東北爲探海石。一石橫出。東指無依。

平頂南爲乾坤亭。明挾仙宮故址。亭始於康熙二十三年建。中有碣曰：孔子小天下處。前一亭。聖祖仁皇

帝額曰普照乾坤。今上額曰獨尊宇宙。內有碑。丁丑首夏壬午孟夏御製登岱詩各二首。勒碑兩面。碑兩側亦有詩二首。

東南爲日觀峯。卽漢官儀及泰山記所謂山頂東巖爲介邱也。其曰日觀者。雞一鳴時。見日始欲出。長三丈所。故以名焉。魏莊董書曰。日觀峯者。夜半可以眺見浴日。彌望如鋪金者。海也。綠色微茫中有若掣電者。海島谿山相間也。金色漸淡。日輪浮動。水中如大玉盤。適海濱望而見海日是矣。王世貞以日觀秦觀越觀爲一峯。言觀日出則爲日觀。西望見秦則爲秦觀。南望見越則爲越觀。後人所指某某峯皆妄也。自天門月觀經絕巔至此。皆曰泰山頂。宋眞宗改稱太平頂也。日觀西爲登封壇。蓋唐時築也。岱史載日觀峯西爲宋築石函。方丈許。亦題刻曰古封禪壇。俗曰寶藏庫。以所瘞金書玉簡故云。唐書禮樂志高宗乾封元年封泰山爲圓壇。又爲壇於山上。號登封壇。旋名登封壇曰萬歲臺。元宗十三年有事泰山。立圓臺於山上。又於圓臺上起方壇。又爲圓壇於山下。典禮樂章可徵也。宋史眞宗東封於山上。置圓臺。又宋史禮志眞宗祥符初有事泰山。記載之甚詳也。按前代登封爲金泥玉簡之事。皆是其地。而壇基無存。岱史云。洪武初。居民於山中得玉匣。內有玉簡十六。有司獻於朝。驗其刻乃宋眞宗祀泰山后土文。又成化十八年秋。日觀峯下雨。水衝出玉簡。會中使有事東藩。復馳以獻。乃命仍瘞舊所。後建日照觀。嘉靖間復置觀海亭。額曰日觀亭。稍北爲望海樓。並圮。乾隆十二年十二月十四日。工人於日觀峯側鑿石。得玉匣二。各緘以玉檢金繩。啓視其一爲祥符玉冊。共十七簡。簡字一行。外用黃縵摺疊裹之。見風灰飛。其一未啓。

其簡尺寸悉如宋史禮志所載。巡撫阿里袞獻於朝。有今上御製日觀峯詩二首刻碑兩面。建亭於上。東爲東天門。又東爲伏虎門。峽口陡險。下爲鴈愁澗。烟雲杳靄。深不可測。水東北流。會洗鶴灣。

日觀峯南爲愛身崖。舊稱舍身崖。三面陡削。絕無尾徑。四方愚民往往爲親病誓代。親愈則躍身投崖以死。明何起鳴繚垣示禁。碣曰愛身鐘。字淳曰。舍本無舍。何況愛緣。非舍非愛。作如是觀。崖上勒宋政和間題名。中立一石高丈許。曰瞻魯臺。俗名旛千石。東巖題海日奇觀四字。旁有可止臺。稍南有方正石。端瑩如碑制。東南爲東神霄山。俗名嚇人峯。懸崖天半。吁駭殊甚。南巖東西有影翠石。下爲九龍峪。納諸水東南流。北折繞神霄。東匯雲河水。晃漾東北。注鴈愁澗。北崖一洞極深敞。曰清靜石屋。中有清泉。元初女冠孫清靜修真處。川林僻曠。塵跡罕至。故俗呼爲仙人塲云。北爲空明山。中穴通明。日光穿午。

愛身崖西爲仙人橋。兩崖戍削。中三石銜接加梁。西爲望海石。巨石坦豁。與日觀埒。西有遙觀洞。俗稱昭真窟。高深幽曠。遊者憩焉。又南石壁峻增。爲蛻仙巖。元好問送天倪子歸布山詩曰。後日天門重登覽。蛻仙巖下幸遲留。有王老石屋。岱史云。翰林王從之跣趺化此。稍東爲滌慮谿。水澈冽西南流。中有突秀峯。泰山小史所稱石筍也。峯頂蒼松偃蓋。今亡。

絕巔東北七里爲鶴山。松敷巖谷多鶴巢云。

絕巔西里許爲丈人峯。狀如老人偃僂。按漢書郊祀志云。大山川有嶽山。小山川有嶽壻。唐段成式酉陽雜俎云。元宗封禪泰山。張說爲封禪使。女壻鄭益本九品官。封禪後。因說驟遷五品。兼賜緋服。元宗見益

官位騰耀。怪而問之。益無詞以對。黃旆綽曰。此泰山之力也。俗稱外舅曰泰山。曰丈人。本諸此。說郛引黃氏語譏之。有今此御製丈人峯詩勒於上。側有碾碗泉。今涸。

西爲石馬山。遊黃華洞進路處也。呂坤因洞路艱危。故題迴車巖於此。

北爲北天門。舊有石坊。額曰元武門。今廢。

又北爲摩雲嶺。丹嶂凌空。嶺東有八仙洞。危若鶻樓。卽馬第伯所云石室也。其下爲亂石溝。水南流。過口塵橋。東折。經鶴山北。又東匯爲洗鶴灣。夾岸陡險。蒼松敲臥。如梁水瀦洄而東注。達於谿里峪。

東北爲獨足盤。明萬曆間創闢此徑。林古度大書黃花棧三字勒北崖。崖環敞如女牆。其上松石杈枒如筍。鐘惺謂之筍城。并題記於崖東北。又東南兩峯回翔。爲雙鳳嶺。舊稱大小牛心石。亦曰大小蠟燭峯。各因形命名。南臨洗鶴灣。

獨足盤東北爲元君廟。內有萬松亭。後改彌勒殿。自東而上爲蔚然閣。下祀呂仙。東有三官殿。圮移像於元君殿西舍。明隆慶六年。胙城大輔國將軍陸樵建。有禁約碑。萬曆崇禎間。州人徐靈哉。王度皆讀書於此。廟北爲天空山。俗稱玉女山。其巔平坦。呼爲堯觀臺。岱史云。堯嘗登此。意或因遙觀而誤之耶。臺前古洞清邃。曰黃華。俗以環洞多黃花故名。傳爲玉女修真處。中有靈異泉。東一洞曰蓮花。石瓣倒綴如蓮。懸霤涓滴。謂之石乳泉。積冰恍如玉柱。有今上御製蓮花洞詩勒壁。卽岱史所謂後石屋也。然鐘亭下亦有石屋。由地道可通蔚然閣。後人於其地立元君墓。傳會滋甚。自迴車巖迤邐至此。總名後石塢。俗呼後十

五言南天門至此十五里爲奧區云。

自天空山東爲九龍岡。上有鑑池。清可鑑髮。俗呼玉女洗頭盆。北爲鳳凰池。東北爲飲虎池。東北八里爲磨山。爲五女罔石。岱史云。夜有呼號相力之聲。詰朝巨石壘成圈。蓋五仙女爲之。又有張遠砦。天空山北爲坳山。蟬圓秀拔爲仙人砦。砦可容千人。摩雲嶺北爲明月嶂。羣峯秀列。儼若屏幃。泰山紀事。宋張景巖結茅隱此。曾產紫芝一本。因名採芝庵。旁有燕脂石。色如塗丹。又北爲懶張石屋。相傳明張三丰煉真處。其西爲孤山。峭傑特起。東北爲小冰牢峪。卽岱史天牢峪也。陰壑層冰。經夏始解。因名凌冰洞。水東北流入天井。北爲眺平臺。舊多花木。天地運度經。太山北有桂樹七十株。其實赤如橘也。西里許爲揚子峪。崖岸深陡。西十餘里爲半邊山。山似擘去其半也。眺平臺西北六里爲大冰牢峪。石凹極闊。又曰冰窞。視水洞危甚。水東北流入天井。

其在東南麓者。對松山東有松巖。老松森竦。陰靄蔽日。西北有婁子洞。傳漢婁敬曾棲此。高深嶮僻。南爲馬鞍山。兩山並起如馬鞍。西南爲祝雞砦。石嶂縱橫六七里。中凹如削。有泉出其巔。曰懸淙泉。瀑水南流。達於雙溝。迤西則所謂老人砦也。其南有巨石紫潤。俗名肝華石。又南危崖鑿磴。或呼石練陀。旁有九間石屋。又東南爲延坡嶺。雙溝環涌。嶺北諸谷水皆匯此。又名東谿山。爲東谿發源也。水東南流約五里。合於艾峪。而注艾峪。東有艾窪村。地多艾。東南五里爲栗子峪。水南流逕小津口。下延坡嶺。南爲楊老塢。岱史稱楊老園。嶺崖險阻。上卻平曠。昔楊老避兵於此。南爲摩天嶺。端巖特起。雲至此多散去。一名爭雲峯。

迤南爲屏風巖。嶺巖之間。橫溝涌流。而東導南折。逕凌漢砦。西曰堰嶺河。河腹雙泉。遞涌匯爲金牛灣。又東南右納青龍泉水。又西南會梳洗河。屏風巖前爲四陽庵。一名潛仙。舊址在西南。明萬曆初道士柴慧庵修煉處。蕭大亨移建於此。庵南石竅滴水曰福泉。又南爲迴龍峪。有筆架石。雙流旋繞。東南會堰嶺河。凌漢砦東爲繡彩灣。水東南流經白家河八十里。河自摩天嶺東四里爲鶉鴿崖。峭壁巢野鴿。東二里爲風門。又南三里爲臥龍峪。本名五龍峪。東二里爲中陵山。東二里爲水牛埠。東北爲小津口村。東西椒山夾之。水東南流入蠶滋峪。又南至沙溝入汶山。西爲椒子峪。南里許有杏園。栗椒杏各以樹之多者得名。南二里傅家村。旁有石舟。巨石上浮如舟也。南里許有地曰謝過城。岱史云。齊魯會夾谷後。歸田謝過於此。然左傳所不載。夾谷今在萊蕪境也。謝過城東里許有漢明堂遺址。案水經注。漢武帝元封元年封泰山。降坐明堂於山之東北陞。武帝以古處嶮狹而不顯也。欲治明堂於奉高旁而未曉其制。濟南人公玉帶上黃帝時明堂圖。圖中有一殿。四面無壁。以茅蓋之。通水環宮垣。爲複道。上有樓從西南入。名曰崑崙。天子從之。入以拜祀上帝焉。於是上令奉高作明堂於汶水如帶圖也。古引水爲壁雍處。基瀆存焉。岱史云。其地舒衍。突起石岡。嶺平而高。四丈許。周約三畝。後枕嶽麓。支山如展障。左右如衛從。然谿水潑洄。南會於汶。遙望徂來如列屏。案當時朝會之規。宛在。元人題刻明堂故基四字。今佚。乾隆辛卯御製漢明堂詩。立碑其上。艾峪水自北來匯此。西折而南。因名明堂泉。其經流曰十里河。由泮歸汶。總名東谿也。泰山泉壑甚多。府志誤入下橋海眼葛溝三泉。均屬蒙陰縣境。十里河東四里有紅亭遺址。春秋昭公八年。秋

蒐于紅。向有土邱。今其邨訛爲紅廟云。椒山東八里爲杏山。有餐霞洞。下爲王老峪。土邱高廣。又西南爲水泉峪。漢明堂東北二十七里有奉高故城。今故縣村是也。旁有大雲禪寺。金大定四年勅牒勒壁。水經注。奉高縣漢武帝元封元年立。以奉太山郡治也。縣北有吳季札子墓。在汶水南曲中。季札之聘上國也。喪子於嬴博之間。卽此處。從征記曰。嬴縣西六十里有季札兒冢。冢圓。其高可隱也。前有石銘一所。漢末奉高令所立。無所述敘。標誌而已。碑石糜碎。廢有遺矣。唯趺存焉。按奉高城東北七里北禪村。旁有大家。疑卽季札子墓。又東南八里過擡頭村。有古城遺址。卽春秋時齊之博邑也。哀公十一年會吳伐齊。左傳五月克博。壬申至於嬴。按嬴邑故城在今萊蕪境也。

其在西南麓者。對松山西南有五陀巖。紅葉嶺。硤石溝諸名稱。西南四里爲石縲山。訛曰石後。又名西谿。山下爲黃西河。上納龍峪之水。經黃峴嶺西。故以名河爲西谿發源也。又西逕九女砦。南一峯高處奇蒨。若蓮。岱史云。昔有九女避兵於此。地多石英。白者如水晶。有色淡紫瑩徹五稜。魏書景初元年。增崇宮殿。鑿太山之石英也。又西逕三尖山南。山西脅有石厂。下爲轆轤岡。自九峯之西爲仙趾峪。一名馬蹄峪。有仙人草履跡。長尺餘。馬蹄跡徑五寸。水西南流逕雞埒嶺。下與黃西河會。又南逕丹穴嶺東。其嶺黃壤舒衍。西下爲八里溝。又西逕鳳凰山。北匯爲馬蹄灣。北受八里溝水。又南過竹林寺西。故又曰竹林西河。寺莫知所肇。自唐迄金。屢興替。元元貞初。僧法海重修。李謙記。明時滿空禪師重建。萬曆間。陶思聖等重修。吳維城記。其時菴竹千竿。銀杏雙挺。今蕩然矣。自白楊坊南爲淩漢砦。砦可容數百人。高處爲淩漢峯。

丹嶂蒼渠。或名金泉峯也。峯南有嶺曰振鐸。峪曰黑虎。水南流匯爲新泉。西折過子午橋而注。中爲普照寺。唐宋時古剎。金大定間奉勅重建。額曰普照禪林。有勅牒石刻勒殿壁。明永樂間高麗滿空禪師國朝康熙初崇川詩僧元玉先後卓錫於此。寺東有元玉別構石堂。并自爲銘。復大書石堂二字。左右題景一十二處。各系以長短句。旁爲元玉塔。有太史淄川唐夢賚塔銘。寺之西南爲滿空禪師塔。而塔銘碑近移寺大門內。塔北爲魯藩相田時耕墓。西北有臥象石。又西北爲投書澗。水南下東受新泉之水。又西南交流。岱史云。投書澗胡瑗讀書於此。十年不歸。得家書見上有平安字。卽投澗中。澗上有碣曰宋胡安定先生投書處。西爲上書院。世稱泰山書院。舊有石介記勒壁。今亡。黨懷英曰孫明復石守道築室泰山。不以爲學館。屬大關獄祠。壩基甫迫。乃北徙山麓。而鄉人指以爲上書院者。則其所徙地也。元好問曰泰山上書院。唐周朴所居。宋孫明復居之。明嘉靖間僉事盧問之。妥孫石神位於此。顏曰仰德堂。後又合祀胡瑗爲三賢祠。春秋致祭。康熙五十一年學政黃叔琳知州徐肇顯重建。乾隆四年知府蔣尙思重修。東偏舊有明人別構。有松亭并題識。授經臺講書臺諸蹟。祠迤西爲香水峪。上接投書澗諸水。西南流會於西谿。上爲三陽觀。舊名三陽庵。明嘉靖時德藩建。鍊師王三陽廬此。萬曆間大興締造。有大學士東阿于慎行碑記。東南爲木末亭。慎行之所名也。白北石級陡絕。而上旁有全真崖。嶺巔曰天外。多松榭。轉而東。有石厂曰三陽洞。一名勝禪洞。觀大門外有救苦臺。南側有三陽墓。又西爲傲來山。巍峩特起。有與岱爭齊之勢。又名芙蓉峯。其巔一洞曰歸雲。內有石池涌流。自竹林寺西南入。高岸深谷。人單行攀藤附葛而上。石



竇可通曰。紫門有金貞祐間題名。西旁一洞中可窺天者三名。曰三透天。俗呼玉皇洞。南爲天勝砦。坦處可容千人。岱史云。漢劉盆子等聚兵于上。有演武場。張旗石及柱窩確磴之蹟。按泰山紀事云。岱西南峯最陡峻處有劉盆子砦。琅邪人樊崇起兵於莒。轉入泰山。後議立盆子。時兵已數十萬。鼓行而西。則盆子固未嘗據此。特以崇歸盆子部下名劉盆子砦耳。元初僧通慧律師行全結茅於奉高山天勝砦。卽此山巔。東北懸石明通明。俗名獅子峯。時行全之徒德友亦避地於此。旁有懸刀峯。東爲扇子崖。傾崎宛如摺筵。明蒲坂楊博題曰。仙人掌。崖北舊多青桐。曰青桐澗。水東流入竹林西河。明季州舉人王無欲築室崖巔。復結茅其下。曰西山別業。其時櫻桃夾徑。松檜盤紆。今濯濯矣。僅存石廟曰無梁殿。祀玉皇。下爲石關閣。洞四虛。上祀元始天真。並無欲建碑記在焉。東有仙桃石。巨石嵌空如桃。東南有會仙庵。圯澗水東注。西百丈崖。青桐潤北。危崖類繚狀。俗稱壺餅崖。其陽有劉盆子洞。仰視洞懸絕而門塞。西北二里爲火焰山。一峯黑鷲特異。南崖一洞深邃。志稱觀音洞。俗訛魔王洞。下爲石屏峪。水西南流過黃金口。入龍潭。西一里有水音砦。平處亦容千人。天勝砦西南爲弄水巖。雙峯崛起。又南爲雞籠峯。圓垂如籠。卽宋錢伯言紀遊所稱處也。會仙庵東爲飛鴉峯。石色深黝。忽若人形對拱。稍白者西。赭者東。曰仙人影。泰山小史所謂衣染古烟碧。神凝秋水清者也。又東爲東百丈崖。瀑瀉若垂紳。名曰天紳泉。下匯黑龍潭。沉碧無底。稍西南爲忽雷灣。岱史云。天將雨時。每聞雷聲迅發於此。又西爲西百丈崖。視東崖倍高。懸流如挂練。亦曰水簾泉。東上爲招軍嶺。舊有石塢菴。又有萃美亭。金知州姚建榮。建元奉符尹王悟重修。廉訪使徐國記。

云。面水簾而瞰天紳。諸景咸會。因榜曰萃美亭。亭圯。記石亦亡。又南爲白龍池。懸崖絕壑。殆非人境。池北層崖橫亘。上復峭削。形若舟。岱史謂之石舟。上鐫元圭石三大字。下層徧刻宋人題名。顧氏金石文字記載之未盡也。池東有三元石。前爲淵濟公祠。岱史云。宋元豐五年。封白龍爲淵濟公。始建祠。縣人趙合爲記。是池禱雨輒應。元明多刻石祠中。今並亡。惟元至正時感澤記。碣尙存。漫漶無撰書人姓名。岱史稱知州路希尹撰文矣。乾隆十三年。車駕東巡。時小旱。遣官致祭於池。遂得雨。南爲鑼鼓灣。水激石嵌如鑼鼓。又南爲耀星灣。澄渙深靜。西崖平削。刻弄水巖三字。又南一石屹立。勒雞籠峯三字。又南爲大峪。中一石如匣。曰劍匣石。一石中分如劈。曰試劍石。一石如人影。戴巾持劍而坐。舒一足。曰仙影石。又南石峽寬隘者二。曰大石峽。小石峽。自黃西河經龍潭龍池至此。爲西谿會歸處。谿水東折。逕元忙兀博羅驢墓。北俗稱土公土母。南一里有豐碑。額曰大元太師。泰安武穆王神道之碑銘。延祐四年四月。姚燧撰。并八分書篆額。兩面皆有撰額。文起南面而北。上截字猶可讀。下截多殘缺。墓西有播鼓石。谿水又南。東受廣生泉之水。繞府城西南。逕古汝陽橋及漆河橋下。又南入泮歸汶。總名西谿也。乾隆三十四年七月四日。漆水泛漲。上下河畔廬舍男女漂流者無算。汶陽橋北爲天書觀。岱史云。觀本名乾元。門閣三重。殿廡三所。宋史禮志。大中祥符元年。閏六月八日。封祀。制置使王欽若言。泰山西南垂刀山。上有紅紫雲氣。漸成華蓋。至地而散。其日木工董祚於靈液亭北。見黃素書。曳林木之上。有字不能識。言於皇城使王居正。居正都上有御名。馳告欽若。遂迎至官舍。授中書捧詣闕。因建天書觀於此。按天書卽欽若所爲黃素書也。當時

君臣相欺。侈言祥瑞。其書詞見三朝符瑞志。龍圖閣待制孫奭曰。天何言哉。豈有書也。國初張習孔雲谷臥餘。遽謂今世失傳何也。觀大門內舊有泉有亭。明人題刻醴泉二字。文獻通考。袁州乾封縣民王用田中有童兒培土。得小青錢數十。爭取之。錢墜石罅。因發石。有涌泉二十四眼。味極甘美。又枯石河。復有涌泉二十五眼。又一眼出層阜之上。經宿勢浸盛。又別引數派。雙魚躍其中。有果實流出。似李而小。味甚甘。及古今錢百餘。封禪經度制置使王欽若貯水馳驛以獻。分賜近臣。詔設欄格謹護之。六月詔建亭以靈液爲額。宋燾曰。余童穉時猶見觀內泉出石崖下注。有垂楊數株。大二十圍。蓋宋祥符時所植。今樹旣烏有。而泉又鑿深爲池。非其舊矣。岱史云。岱頂玉女池。北有靈液亭。宋史無之。泉側鐵浮圖十三級。明嘉靖十二年造。自正德間卽其中爲元君殿。嘗遣中官致祭。有御祝文勒殿東壁。其後爲九蓮殿。萬曆間命使特修告竣。改天書觀。顏爲天慶宮。岱頂天啓五年金碑所載也。又其後爲智上殿。崇禎間勅建副使左佩佐碑云。皇上追崇孝純皇太后爲西天淨土極樂世界菩薩。上號曰智上。建寶刹於岱。辛巳啓土鳩工。三載告成。攷神廟時尊孝定皇太后爲九蓮菩薩。卽今智上前殿者。像設皆範銅鍍金爲之。按九蓮菩薩語見毛奇齡彤史拾遺記。乾隆十一年觀大門樓災。其西有翠陰亭。亦宋時建。圯。西爲泰山書院。乾隆二十九年知府姚立德購置民舍改建。知縣程隆記。西北七里爲皇碑亭。有康熙三十七年萬姓感恩碑。其北一亭有四十三年聖祖仁皇帝御製詩勒壁。西爲下泉。其水自傲來山西飛瀑而下。中有石鼓。巨石如懸鼓也。東南流入泮。西五里爲大埠嶺。古有大佛寺。範銅爲像。高丈餘。

其在東北麓者九龍岡。東爲天燭山。兩峯聳立如炬。東西遙相對峙。卽吳同春續遊泰山記。誤指爲介邱者也。按廣雅。小陵曰邱。則非高山可知矣。其下爲谿里峪。巖穴深邃。涌泉不竭。昔有魔女化此。又名風魔谿。東南流入埽帚峪。天燭山東爲分水嶺。其南則有埽帚峪。李家泉諸水。其北則有旋螺峪。冰牢峪諸水。皆循嶺分流焉。東二里爲觀星嶺。東北卽李家泉水。南流入栗子峪。分水嶺東爲颺嶺。有村曰大津口。產楂栗。東北多榭林。世謂之山蠶廠。北五里爲竹子園。其西地極平曠。羣峯環峙。林木鬱葱。雙谿潏繞。交流中爲周明堂故址。封禪書。太山東北陞。古時有明堂處。齊有太山之明堂是也。漢之廢基。又在其旁。今稱明堂村。訛曰明家灘。據金學士黨懷英谷山寺碑云。嶽東北陞有明堂。引沈存中說。而以爲漢。蓋懷英生長泰山。通掌故。本水經注。漢武帝封太山。嘗降坐明堂於山之東北陞。逼近周明堂處。武帝以古處嶮狹不顯。今奉高作明堂於汶水如帶圖在山之東南陞。去周明堂三十里。又僂史稱周明堂故址在嶽東北麓。旁有谷山寺。蓋指地之著者而言。按寺基嶮僻。距明堂尙十里。顧引懷英碑記。強爲牽附。殊未可信。明堂南爲大峴山。西南爲黑山。西北爲谷山。屹峯特異。絕頂孤松挺秀。俗名定南針。頂之西南有黑關石屋。頂之西北有金礦洞二。其在東者。懸崖上下二穴。水自崖巔下注。其在西者。一穴幽暗。出水人不能入。洞外多裂石。紋皆結紫石英。卽僂史稱金絲洞。元初邱處機煉丹處也。又東北有蓮花峯。谷山西北爲恩谷嶺。兩山中峽。俗名雁嶺河。水東流。匯爲天井灣。嶺北爲佛峪。亦曰佛谷水。東流與馬跑泉會。其上有寺。額曰谷山玉泉禪寺。元魏時僧意降錫處。至金釋善甯重建。有黨懷英撰谷山寺碑及秦和大安間勅牒。

碑。東有古井。水色紫黑充盈。遇旱不減。懷英八分書玉泉二大字碑。東北而上爲藥師七佛閣。元至元間釋普謹建。久圯。學士閣復碑記在焉。北爲返倒山。爲青岡峪。水東南流入天井。爲仙臺嶺。卽長城嶺。其上石臺有二。曰南拱。曰北拱。遙相對峙。山東通志謂漢武帝於此望祀蓬萊而史無其文也。又北踰仙臺嶺。至玉皇嶺。爲歷城長清界。仙臺之陽有馬跑泉。又名莎草泉。水南流逕牛欄口。西又南入天津河。自牛欄口東十里。有地曰藥園。蓋昔人嘗種藥於此。又有千戶廳。稱名無攷。東三里爲龍門山溝。水東南流東北五里。爲鹿町山。有黃伯陽洞。岱史云。戰國時黃伯陽修隱處也。大津口東五里爲青山。絕頂巨石如冠。漢書昭帝元鳳三年春正月。泰山大石起立。高丈五尺。有白鳥數千集其旁焉。南爲望仙臺。岱史云。漢武帝築也。東南有黃姑庵。青山東四里爲升仙嶺。東南爲石汶。源出天井灣。納諸谷之水。東南流繞周明堂側。曰天津河。右會旋螺峪水。又東南逕竹子園南。右會雁愁澗水。又東南逕大津村北。又東逕青山北。曰麻落河。北四里有仁育庵。又東左會龍門溝水。又東北介仙源嶺鹿町山之間。曰津拱河。陡岸深凹。昔人所云石釜也。又東北左會巖洸河水。又東而南卽入石汶處。北八里爲門家墅。爲會仙觀故址。元道士孟養浩修煉於此。有至元五年鹿森記碑。旁有方井。井四洞。淵泓莫測。觀北爲雨金山。有伏金石。傳昔大雨沖出金礦。東北六里爲大盧山。東南三里爲小盧山。中夾巖洸河。過黃坂前村。東西北十三里爲轉山。爲石隴砦。國初侍郎王度知總范惟粹故居也。自黃坂東北過兩港村。三四十里。至長城嶺下。櫛林尤勝。巖洸河發源於此。小盧山東八里爲祝山。單椒圓特。有國初巡按趙宏文墓。東北二十里爲九坂嶺。爲九曲

峪水西流過雨砧崖淥池。南折至九頂山。後又東匯金井河。東南一山。巽衍背聳。谿深。上有數穴如頤。俗名笏山。又曰石窟山。或稱蕭然山者。誤。封禪書漢武帝禪泰山下。陞東北蕭然山。舊志未詳。顧炎武攷引酉陽雜俎。以長山縣長白山當之。非是。魏書崔光傳。弟敬友嘗於蕭然山南。設食以供行者。又萊蕪王許保北有山碑云。古宿巖山。恐卽蕭然山也。按楊邱山東有小陵。舒暢崛起。是其地矣。自祝山東五里爲狼虎峪。水南流入汶。五代史黃巢死於泰山狼虎谷。聞見後錄。巢爲尙讓所急。陷泰山狼虎谷。乃自髡爲僧。得脫於此。並存放。東北三里爲九頂山。南有大家俗稱爲黃巢墓。金井河繞山東南。折而西南。其河西涘曰西金井。人或淘金於此。以東金井在河東涘萊蕪境也。又西南逕汶里村。東入汶。岱史載嶽西桃花峪。嘗有人採白金礦。山海經云。其下多金。是也。又云。其上多玉。今不可見。然嶽巔時炫光彩。意或玉韞之輝。與文獻通考。後齊天統初。岱山封禪壇玉璧自出。殆其驗矣。石汶又南逕崖下村。東有育英書院。明州人李汝桂講學其地。世稱理學名儒。又南有李汝桂墓。石汶又南逕山口村。東抵故奉高。西自天井灣至此。逶折九十餘里。左受萊蕪原山之水。過古博邑城北。合爲塹汶。西南流有塹汶河村。碣曰。古靜封鎮。縣志誤以大汶口村當之也。按述征記。泰山郡水有北汶。羸汶。牟汶。柴汶。與水經注之石汶。世稱五汶。皆源別流同。其經流總名大汶。又西南與萊蕪之牟羸二汶會。經無鹽山北。又西南過博縣故城南。右會北汶。而南折。循徂來西麓。過陽關故城西。至大汶口東。左納柴汶。本名小汶。大小二汶交流。又西南經東平汶上界。入南旺湖。分水口。南北分流曰運河也。

其在西北巖者。避人厂西北有船石。層崖闊數丈。西北爲看月巖。爲沐龜溝。水西北流。經李子溝。至老虎窩。入桃峪。又北。土地平曠。亦曰快活三里。有雲臺庵故址。庵後石厂深廣。而西闕。曰夕陽洞。所謂上石屋也。自桃峪之北而起者。其水過陀頭巖。南折而西北。爲混元池。石岸皆黑。中央獨白如月印。激潭。又西北。過鴈窩崖。西。陡崖多鴈巢。北爲清風嶺。其嶺延亘孤高。鑿磴崎嶇。下爲老虎窩。石穴深暗。中有水。又東。石厂相通。最深敞。側有元都觀。久圯。又西北爲龍灣邱。巒突出如鳥嶼。下有碧花池。石皆碧紋。天然池甃。又西北。逕黃石崖。南。稍西林。木匝里許。中爲野人之廬。轉而北。三里爲映霞峯。舊有傅老庵。下爲香泉。水南流入桃峪。西北爲猛虎溝。蓋孔子嘗歎苛政猛於虎。後人強名之耳。爲花園。地多金銀花。爲青天嶺。北至長城嶺。兩嶺夾澗。其澗一源兩分。卽水經注分水谿也。一東南流。一西北流。西北流者出青天嶺。西南至秦長兩縣界首村。過濬川橋。折而西北。其經流曰中川。循長城鋪。達於崑山。左納靈巖諸谷水。而注東南流者。遶青天嶺東麓。南折左會虎溝水。過海眼桃花峪。再轉東南。其經流曰北汶。與中川分流各半。故名泮河。或謂從桃花峪分流。非矣。按長城嶺俗呼大嶺。古長城所經。戰國策所謂齊有長城巨防者也。史記六國年表。齊威王十一年。趙取我長城。楚世界還。蓋長城以爲防。正義曰。太山郡記云。泰山西北有長城。緣河經泰山千餘里。至瑯邪臺入海。齊記云。齊宣王乘山嶺之上。築長城。東至海。西至濟州。千餘里。以備楚。今太山郡記齊記皆不可見。而竹書紀年謂周顯王十八年。齊築房以爲長城。其時蓋齊威王之二十八年。而顧祖禹讀史方輿紀要引管子云。長城之陽。魯也。長城之陰。齊也。則春秋時已有長城矣。城因

山爲之起平陰之防門。緣泰山北岡而東，徑萊蕪博山，臨胸沂水，莒州日照諸城，蜿蜒幾二千里。至膠州海中，大朱山止焉。太山郡記及水經注，括地志皆謂至瑯邪臺入海，或指地之著者而言，其實相距尙六十里也。猛虎溝西南爲河上林村，多桃樹，峪水又西南，中有石窟，深不測，曰大海眼。西納白草峪水，峪南爲螻頭巖，形如岸幘。西南爲老鴉峯，俗名老鴉尖。東南舊有碧峯寺，圯。蕭大亨碑記在焉。西南爲鞦韆山，下爲鞦韆峪，有桂師庵故址。西崖一洞深窈，岱史稱白鶴洞，所謂下石屋也。又南爲龜灣，其下長石鼓，斜曰石脛，達於小海眼。西南爲西神庫，巨石朗潤，給饒躋之搖動，或謂中有寶藏云。又南逕中軍坪，石闕多文彩。又南注大小養魚池，迤西爲樞負山，卽岱史樞山也。以大山負小如樞子狀，山半有鏡兒石，徑一丈餘，瑩削如鏡。東南有坦地約十畝，俗呼臺子地，舊爲古雲臺庵，有明正德釋道轉重建三教堂碑。西南爲元君廟，內有玉皇殿及鐵佛殿，移碧峯之鐵佛建此。魚池南卽桃花峪會歸處，舊時多桃樹，又名紅雨川，有今上御製桃花峪詩，勒北崖。又西南出峪口，再折而東，經新莊，達于廿里舖。又東南過高里山，南又東南過全標店，東自分水谿至此，傾曲凡八十餘里。總名泮河，上內三谿之水，合於大汶河，自桃峪之南而起者。混元池下三汶澗自西來入之，西爲十字峯，峪水又西北。大倒溝自西來入之，溝西爲青龍宮故址。南爲青嵐嶺，西爲丁香峪，多紅白丁香花，西爲思鄉嶺。岱史云：人死魂歸於此而思鄉也。峪水又西北，小倒溝自西來入之，溝西爲南頂，峯巒突起，頂西南爲胡桃園，多胡桃樹。南爲梯子山，爲石厂溝。西有玲瓏石，梯子山西南爲透明山，陡削玲瓏。北拱老鴉峯，宛如几案。南有摩耳石，東南爲東神庫石，若垂簾無



苔痕。時或光彩閃爍。與西庫埒。東爲龍山。上爲姜倪嵒。南一石若人形。名曰真人峯。西南爲黃石巖。巖南有白姑庵。白姑無所考。或因黃姑而傳會之耶。南爲車道巖。北有雙溝如轍跡。又西爲筆架山。五峯排列。崖罅倒懸多野巢。卽岱史雕窩山也。山北爲羊欄坡石。岱史謂仙人牧地。周有巨石。秀麗尤奇。山南爲燕脂坡。地多燕脂瓣花。青嵐嶺南爲猴愁峪。西爲白練石屋。中巢拖白練鳥。西南爲水閣。石屈出水不竭。又南爲拔山。視諸峯差高。岱史謂之鴈飛嶺。東有一石聳立曰回鴈峯。東北爲燕窩石。大石有窟如燕窩。轉而南爲水鈴山。水聲觸石似鈴也。東南爲烏龍潭。西爲壇子澗。拔山西爲五峯頂。東巖蒼松叢茂。俗呼松樓。東北有黃姑庵。按黃姑率牛。星別名也。拔山五峯之間曰風門。南爲迎風嶺。下有枯石。河水東流。經龍潭。南折過大埠嶺。東入泮。又南爲西橫嶺。其嶺西自桃花峪。東至烏龍潭。橫亘二十餘里。西上爲黃金口。西北爲海棠峪。多秋海棠花。高三四尺。夏日卽開。西南爲臍子溝。中有臍子峯。一石峴秀。流水盤旋。西爲刺楸山。以多刺楸樹得名。西爲土絲山。陡險。巔平黑壤十八畝。西南爲駱駝嶺。有藏峯寺。創於元。重修於明。有碑記。東爲蓑草泉。南流入泮。西爲縞峪。西二十餘里爲三館山。三峯相連如鼎足。有龍駒寺。明時重修。寺前古木參天。甘露泉東流入於泮。西十二里爲黃山。沆泉瀝瀝。古有延慶院。宋海定禪師重建。元明皆重修之。額曰雲臺寺。州人周冕記。西爲肥城縣界。

其名蹟在城中者。岱廟東南爲東嶽冥福禪院。唐開元間創建。後唐釋智順。後晉志隱。皆相繼增修。僞齊時海巖重建。改曰崇法禪院。元重修之。內有後唐長興四年勅牒碑。僞齊阜昌二年重刊。額曰特賜冥福。

禪院地土之記。碑上下兩層。字大小不一。後晉天福周元休撰。東嶽冥福禪院新寫藏經碑。明正德任文獻撰。重修寺碑可考。佛頂尊勝陀羅尼經幢。無年代。書人姓名。金泰和黨懷英撰。新補塑釋迦佛舊像斷碑云。舊爲嶽祠區。奧釋迦佛像主伴凡五位。並遷置於賜書閣之廢基。有鄉老趙璠以正殿曠久。始就緒重新之。其曰賜書閣。則藏歷代勅牒及御書經文典誥處。今斷碑移置縣署。土地祠壁南爲龍王廟。卽宋封白龍爲淵濟公也。乾隆三十年知縣程志龍以白龍池淵濟公祠久廢。始建祠城中。

東有會真宮。卽古奉高宮。宋真宗東封。嘗齋於宮之穆清殿。以宴羣臣父老者也。岱史云。元張志純居會真宮。數載。道行超羣。叢賜號崇真保德大師。授紫服。宮在明時尙有玉皇殿及李白詩刻。成化十八年重修。萬曆二十二年八月初七日。悉燬於火。僅成志純偈頌勒壁。後卽故址改建關帝廟。歲時致祭於此。內附張僊祠。岱史云。唐開元中與李某同至泰山學道。李辭歸襄陽。後張僊繫林檎以示異。故祀此。又南爲魯兩先生祠。其學館尙在。岱廟地併於廟。而後徙於山麓。大定十九年始建祠於大門之左。黨懷英記。此則成化二十三年知州胡瑄請於朝而建者。吳寬記。國朝順治十年。學道施閏章等重修。爲文以記。今名二賢祠。西北爲和聖祠。多明人石刻。歲時祭焉。岱廟西北爲長春觀。元初知州張郁建。金鄉女冠營守慎嗣法於燕京長春國師。後修真於此。賜號妙真觀。圯有中統二年元和子記碑。金石文字記云。長春觀有元丁亥年碑。岱史云。有邱神仙牒及成吉思皇帝勅旨碑。並亡。按邱神仙卽元之邱處機。成吉思皇帝者元太祖尊號也。

城北門外西北隅爲白雲觀。明萬曆間周藩奉國將軍勸鯤建。祀王母。其後增祀元君。殿設雕欄。樓榭層  
匝。今改稱梳粧院。其東爲駐蹕亭。乾隆三十五年建。

城東門外東北隅爲風伯雨師廟。元至元年建。岱史云。按天文志。風伯箕星。雨師畢星也。先是廟廢。止遺  
一碣。明成化二十二年旱。零不雨。或油然雨狀。輒爲風散。知府蔡晟詣其所祭之。風息大雨如注。因復立  
廟。尋圯。嘉靖中知州鄭豸易以壇。

城南門外迤東有臺基。其上卽宋眞宗登泰山謝天書述二聖功德銘。五石合成。制若屏障。高九尺。通寬  
二丈三尺一寸。額高二尺八寸。寬四尺八寸。與岱巔殘碑字畫無異。以圓臺在山頂。故字從北向。俗呼陰  
字碑。明巡按吳從憲篆刻其前曰泰陰碑。其北舊有從憲所建泰陰亭。并自爲記。揭其亭曰昭事上帝。翌  
其門曰升中古蹟。東南爲宋封祀壇故址。眞宗東封時所築。有王且壇頌碑。又有九宮貴神壇。久廢。陰字  
碑南爲朝覲壇故址。有陳堯叟壇頌碑。壇上舊有壽昌殿。眞宗以朝百官者也。又有瑞雲亭。泰山紀事云。  
當時御香亭也。眞宗將登封。齋於會眞宮之穆清殿。有黃白雲如幢蓋龍鳳狀。起大平頂。焚香再拜。雲變  
五色。復有雲如橋梁。紫雲覆之。久而不散。遂以名亭。今改爲山川壇。又東南爲唐封祀壇故址。唐書禮樂  
志。高宗乾封元年封泰山爲圓壇。山南四里號封祀壇。旋名封祀壇曰舞鶴臺。元宗時亦爲壇於此。有張  
說壇頌碑。佚。壇北舊有白驪冢。鄭棨開元傳信記。上將登封泰山。益州進白驪。至潔朗豐潤。權奇偉異。上  
遂親乘之。柔習安便。不知登降之倦也。告成禮畢。復乘而下。纔下山坳。休息未久。而有司言白驪無疾而

殪。上歎異之。諡曰白驃將軍。命有司具櫬。積石爲墓。在封禪壇北一里餘。於今存焉。岱史所載本北。泰山小史謂在嶽陽。碑記冢蹟尙存。泰安縣志在紅門東。然紅門東有豐碑斷路。跌下磨滅無字。惟碑額稜上有垂拱元年。月廿五造。二年五月十二字。碑側猶存宋人題識。當日東封安在哉。茫茫今古。泯塵埃。字句可讀。翻轉審視底面。有行書。字影差小。隱隱莫辨。按趙明誠金石錄云。唐登封紀號文。高宗撰。并行書。飛白書額小字。乾封元年二月一勒石山下。不知毀於何時。一立碑山下。意或武后補刻。以殘碑及開元記證之。白驃冢在城東南。失其處矣。南郊有皇恩碑亭。乾隆十三年士民恭建。

城西門外南折爲靈芝街。宋史眞宗本紀。大中祥符元年十月丁未。法駕入乾封縣奉高宮。戊申。王欽若等獻奉山芝草三萬八千餘本。此街之所以得名也。迤東有青巖書院。明宋熹青巖社也。康熙中趙國麟嘗講學於此。巡撫蔣陳錫檄知州石鍵增葺。乾隆五年知府王一夔以泰山書院久廢。就宋氏社拓修。因易名街南爲靈派侯廟。後晉天福六年建。其神舊稱漆河將軍。又曰通泉侯。宋眞宗東封。泉水方涸。俄有清流涌出。賜封靈派侯。有元豐王或撰重修木根記。元至元王正撰重修廟記。碑具在。西有金星泉。水南流。明人建金銀橋。引城濠水入漆河。今僧道作法事。有金銀橋。漆河橋。以誑世取財。蓋借此傳會耳。河西溪爲煉魔堂。一名岱嶽禪林。嘉靖間主簿州人張思齊同弟思周。思尊。以禳父疾建。有提督肥城李邦珍記。南爲靈應宮。元君下廟也。廟剏無效。萬曆三十九年奉勅拓建。賜今額。有張邦紀碑。其制前後殿廡迴廊周密。中爲崇臺。四門上起銅樓。號金闕。殿宇欄楯像設皆範銅鍍金爲之。舊在岱巔。嗣後移遙參亭。復

置於此。其東爲駐蹕亭。乾隆三十五年建。西爲社首山。高僅五丈。封禪書云。周成王封太山。禪社首。注應劭曰。山名在博縣。唐書禮樂志。高宗爲降禪壇於社首山上。旋名降禪壇曰景雲臺。元宗禪於社首。宋史禮志。眞宗禪社首。有王欽若壇頌碑在焉。又宋史太平興國中。有得唐元宗禪社首玉冊蒼璧。至大中祥符元年。令瘞於舊所。後立相公廟。神稱高里。爲東嶽輔相。壁勒元豐胡元資記。或謂趙韓王者誤。西北有對岱亭。明李戴毛在建。西南有環翠亭故址。近改爲閻王殿。下有後晉總持咒幢。天福九年僧歸仁正書。字多剝蝕。後書題名內有岱嶽鎮使及岱嶽鎮都虞侯官名。則舊制所未詳。西爲亭禪山。本名高里山。崔嵬類龜。漢書武帝紀。太初元年十二月。禪高里。卽此。注伏儼曰。山名在泰山下。注師古曰。此高字自作高下之高。而死人之里。謂之蒿里。或呼爲下里者也。字則爲蓬蒿之蒿。或者旣見泰山神靈之府。高里山又在其旁。卽誤以高里爲蒿里。混同一事。文學之士。共有此謬。陸士衡尙不免。況其餘乎。今流俗書本。此高字有作蒿者。妄加增耳。山之陰有古仙洞。訛謂鬼仙。蕭協中曰。洞深暗。余嘗偕友探奇。執燈籠火種而入。曲徑寬隘者三。有窟不甚深。內石牀一。石磴二。登牀捫其頂。一穴上有巨石塞之。旁無所通矣。山之陽有玉仙石。片石瑩潔。乾隆二十六年。知縣程志隆。廣栽松柏培護之。迨三十四年。工人采石。自洞門上下劈去數丈。而形勢遂失其舊。高里社首之間。爲高里山神祠。額曰森羅殿。顧炎武曰。自晉陸機泰山吟。始以梁父高里並列。而後之言鬼者。因之。遂令古昔帝王降禪之壇。一變而爲閻王鬼伯之祠矣。祠創建無考。元至元二十一年重修。徐世隆記。明成化三年重修。許彬記。萬曆間奉勅重建。見岱頂天啓銅碑。

城南四十里爲介石山。岱史云：宋真宗大中祥符元年禪於此。按宋史無其事。南二里許爲石閭山。有尋真洞。漢武帝本紀：太初三年所禪卽此。按史記：石閭者在大山下陞。南方方士多言此仙人之閭也。縣志以俗所云五道嶺當之。誤。五道嶺在其北十里。石閭南三里爲亭亭山。史記稱黃帝禪亭亭。水經注：汶水又西南。逕亭亭山東。黃帝所禪也。山有神廟。水上有石門。舊分水。下漑處也。漢書地理志：泰山郡鉅平注。有亭亭山祠。宋真宗大中祥符元年封山神爲廣禪侯。遣秘書丞直史館姜嶼致祭。有御製碑。元知州張郁。知縣張佺重修。南十三里爲大汶口。有石橋。雍正間重建。水經注：汶水又南。逕鉅平縣故城東。而西南流。城東有魯道。詩所謂魯道有蕩。齊子由歸者也。按鉅平爲晉羊祜原封采地。武帝以平吳功封南城侯。固辭不拜。仍爲鉅平侯。上從之。有今上御製羊祜城詩卽此。又西三里許。過衛駕莊。爲行宮。內有四賢祠。乾隆三十年車駕南巡。三十六年幸曲阜。駐蹕於此。有御製四賢祠詩曰：孫石氣求永聲應。孔胡異轍並升堂。大汶口東南三十里爲梁父山。平衍突出。封禪書：古者封太山。禪梁父者七十二家。而夷吾所記者十有二焉。其上舊有地主祠。史記：二曰地主祠。泰山梁父。蓋天好陰。祠之必於廣山之下。小山之上。命曰時。漢武帝及光武帝皆降禪於此。而壇址無存。南爲梁父城。漢時置縣。屬太山郡。水經注引開山圖曰：太山在左。亢父在右。亢父知生。梁甫主死。王者封太山。禪梁甫。故縣取名焉。諸葛亮幼從父爲梁父尉。父卒後。徙居南陽。好爲梁父吟。謂此也。今其村爲梁父云。

城西南七十里有虵邱故城。今樓上村是也。水經注：汶水又西。泚水注焉。今謂之濟河。又西逕虵邱縣南。

縣治鑄鄉故城。春秋左傳宣叔娶於鑄者也。汶水又西。蛇水注之。水出縣東北。西南流。逕汶陽之田。齊所侵也。自汶之北。平陽極目。僖公以賜季友。卽此。蛇水又西南。逕鑄鄉城西。左傳所傳蛇淵囿也。故京相璠曰。今濟北有蛇邱城。城下有水。魯囿也。俗謂之濁須水。非矣。按蛇水上納靈應諸泉。又曰匯河。其下游卽濁須水。或謂之濁河。西南三里許。有汶陽故城。今城上村是也。水經注。汶水又西南。逕魯國汶陽縣北。王莽之汶亭也。縣北有曲水池亭。春秋桓公十二年。經書公會杞侯莒子於曲池。左傳曰。平杞莒也。故杜預曰。魯國汶陽縣北有曲水亭。按樓上匯河之間有土邱。傳爲曲水亭址。汶水逕汶陽城南。不在其北也。城上村南七里爲闕陵故城。水經注。漢章帝元和三年。東巡泰山。立行宮於汶陽。執金吾耿恭屯城門於汶上。基壘存焉。世謂之闕陵城也。迤西立元君廟。圯而通志以汶陽闕陵爲一城。並曲池載入甯陽縣境。又西約二十五里爲顏子坡。岱史云。州治西南境有高坡。孔子引顏淵望吳門繫馬。因與俱下於此。城東南二十二里有橫埠。狀類龜埠。北之田曰龜陰。按水經注。博縣北有龜山。山北卽龜陰之田。春秋定公十年。齊人來歸龜陰之田是也。西南有石塔五級。曰聖塔。蓋遇旱乾。水溢禱輒應。金明昌三年。李德元等建。壁勒安升卿記。南三里卽博縣故城。漢之博也。城東爲天封寺。舊號郭頭寺。宋祥符有事泰山。更以天封爲額。金大定二十四年。僧道先法越重修。有黨懷英碑記。

泰山東南三十里爲徂來山。山於泰山猶旁兒。然水經注。山多松柏。詩所謂徂來之松也。鄒山記曰。徂來山在梁甫。奉高。博三縣界。猶爲美松。亦曰尤崆之山也。赤眉渠帥樊崇所堡也。故崇自號尤崆三老矣。後

魏地形志。太山郡梁父縣有徂來山在北。輿地廣記。唐省梁父入博城。歐陽修曰。徂來魯東山。孔貞瑄曰。龍脈自泰山。傲來經金牛龍山。蜿蜒東赴。至水音堂。嶽汶盤結於此。大小汶絡其面背。山周百六十里。自郡城至山北。蹊徑逼窄。遊岱宗而探徂來之勝者。則繞山之東西兩路。自前而入。約百餘里。自山南而突起者。爲三嶺。一名三台山。北巖曰獨秀峯。傳云李白題勒。上爲九龍宮。中爲玉皇廟。明崇禎間重修。其下爲感應侯祠。祀徂來山神。山東通志。金明昌元年封爲護國感應侯。今祠圯。松柏猶存。西北里許崖壑瀉水。羊公河出焉。逶折西南流。逕羊祜廳北。又西南注小汶。西北五里爲二聖宮。古稱二聖堂。元鹿森隱居處。東南峭石壁立。篆書貧樂巖。演易齋諸蹟。杜仁傑爲譏銘。殘缺不可讀。許衡嘗讀書於此。扁其室曰魯齋。後卽以爲號。堂剏於元初。開國侯徂陽時珍建。有益津高詡碑記。增祀玉皇閣。王母殿。三清殿。稍北石洞方廣。趙國麟名曰箆瓢。又北乳山秀峙。舊多竹木。谿水繞前而西注。古刻竹谿佳境於巖。按孔氏紀勝。唐天寶間李白。孔巢父。韓準。裴政。陶沔。張叔明隱此。號竹谿六逸堂。然二聖堂卽六逸舊基。而俗誤以黨竹谿當之也。乳山之北。嚮水河出焉。上納諸谷水。匯此西導。曰日新池。達於毛老谷。過茅茨村南。又西入大汶。東北四里爲萬松嶺。下有石屋。甘泉清冽。北十里雙峯。頡頏爲徂來絕巔。亦曰太平頂。古有感應侯祠。今並其基亡矣。頂西有紫霞洞。下爲李源砦。自來泉。飛流自乳山。西二里舊有毛姑庵。元初州人毛仙姑居之。修持三十餘載。臨化留頌。秦定軍節度時宥爲紀石於墓。遂稱其地爲毛老谷。西十里爲懸珠山。康熙間。高沙臥雲者居此。因立臥雲庵。祀呂仙。圯移像於南樓。有九龍嶺。八道溝。石幡峪。東崖懸石如



珠。此山之所由名也。匯水爲漿池。南流會響水河。西三里爲藥山。有聚泉庵。俗稱大庵。西五里爲北頂。有佛寺。明宏治間。僧文原重建。州人徐鑑記。西爲廣長嶺。西五里爲團山。有古四禪寺。北齊河清二年創建。金大定二年奉勅重建。賜額法雲禪寺。有勅牒碑。僧法潤。福燈相繼住持。元至元間高峯禪師重修。乾隆三十四年七月四日大雨。東山裂泉橫流。而寺基無存。上峪之水西流曰滄浪。溝中屹立一石。泰安縣志謂之曬纓臺。又西南入大汶。西南里許爲望山。有老君洞。南五里爲他山。白蓮泉發源處。水西南流。逕積穀山。南入大汶。泉北有法雲禪寺。僧福燈建。有大定二年勅牒碑。碑上下兩層。上刻勅牒。下鐫張莘夫記。自三嶺園東六里爲女智園。西北四里爲天平前砦。赤眉所堡卽此。地極平曠。桑石爲臺。基趾猶存。又東三里過清風頂。南又北二里。跨澗爲橋。名曰隔塵。西爲升仙臺。北爲隱仙觀。祀呂純陽。內有玉帝閣。三清殿。明萬曆中有于仙號。虬虛者。闢此修養有年。蟬蛻完真。觀門外古木夾徑。多桃竹。由水匯池南流。有康熙間趙國麟撰贍田碑。及題刻。徂來第一桃源深處諸蹟。又西南二里爲桃花峪。自觀東石屋東。闢有天然丹竈。傳爲于仙煉丹處。國麟書煉丹爐三字。稍東爲礫石峪。石陂廣數畝。飛瀑雪浪。勢若建瓴。至觀南與西澗合流。繞天平砦。又西南注羊公河。觀北踰小普陀巖。二里孤峯插天。世謂之貴人峯。西有于仙葬衣冠冢。貴人峯東四里爲風門口。爲西別谷水。東南流里許。有釣魚臺。東南三里過巉山。南朱櫻夾岸。曰櫻桃園。東二里爲演馬嶺。爲東別谷水。西南流五里。與西別谷合流。南注小汶嶺。上爲趙州庵。圯。僅存。呂仙閣。中爲北斗殿。俗呼團瓢。下爲三皇廟。舊稱寺基。南五里爲砦山。又東五里爲雍山。藍谿出焉。水東南

流過鎮里村西。又南入小汶。其上有光化禪寺。寺創於後魏。宋祥符間。賜號曰崇慶。元初時。珍重修。高詡  
 記。內有濬池。注茶舍。東南里許。一巨石。南面刻北齊時隸書。大般若經。字徑五寸。多剝蝕。惟曰空。有無十  
 餘字。隱隱可辨。後書冠軍將軍梁父縣令王子椿。餘猶有道字。僧真造數字。其東面大書四佛名。末有中  
 正胡賓武平元年。縣志以中正誤爲正月。薤山東北爲圓瓦崖。爲大悲庵。東南三里爲映佛巖。上刻隸書  
 般若波羅密經。冠軍將軍梁父縣令王子椿十七字。其文云。文殊師利曰。佛言世尊。何故名般若波羅密。  
 佛言般若波羅密。無口無口。無名無相。非口口無歸依。無洲口無口無福無口無口如凡界無古今。口亦  
 無闕。三十二字。普禧武平元年。僧齋大衆造。後有四字類押狀。不可識。字徑一尺及七寸不等。蓋因石爲  
 之。又東一里爲黑山。東五里爲松山。有松巖洞。東南一里爲靄蒙山。其山兩穴可通。曰靄蒙洞。又南里許  
 爲兩埠山。兩山對峙如岸。已上皆屬徂來之陽。自絕巔北二里爲芍藥峪。峪東北三里爲紫澗池。產九節  
 菖蒲及玲瓏草。水東北流。經天平後砦。東至沙溝河。北折過西莊。又西北入大汶。峪西北二里爲花坡。北  
 二里爲中軍嶂。以地處徂來適中也。康熙間建三清殿。前有地洞。深暗。西爲招軍石。周多石春。旁有隴旺  
 泉。下爲大峪。水西流入鴈愁澗。北五里爲玲瓏山。秀拔玲瓏。有壑人洞。相傳唐王希夷嘗隱此。自中軍嶂  
 東二里爲金魚石。巨石中有魚形。若隱若現。相傳一夕風雨。石劈化龍去。半踏於地。兩石魚痕宛在。有明  
 知州許應元題識。東五里爲長春嶺。黃壤秀異。周袤約十里。宋石介卜築其下。多從遊者。世謂之徂來書  
 院。今遺址猶稱爲講書堂。所著有徂來文集二十卷。明人采怪說二篇入諸子彙函。俗稱石介。因竹谿六

逸堂築室著書。非是。旁有姜潛別墅。號曰讀易堂。石介在蜀寄題詩曰。連雲棧外四千里。讀易堂中一峽。書北爲天平後砦。按此砦去中軍嶂不遠。皆樊崇聚兵處。有演武場柱窩遺蹟。又東爲龍谿。水東北流。過燕子石屋側。危崖瀑流而下。曰濯龍灣。以崖上凸起三畫。婉若游龍。故云。北導西折曰四里河。繞徂來北麓。又西南入於大汶。天平砦東北爲西仙霞隴。又東爲鳳鳴山。若鳳舉其首。下爲黃峪。又東爲東仙霞隴。又東爲虎穴山。爲牛山。山南有朗僧洞。神化庵。山北有大藏峪。自中軍嶂西四里兩峯並峙。俗稱角山。三石懸立。曰鞦韆峯。又西登土嶺。爲大砦口。迤東陡岸幽谷。則所謂鴈愁澗也。水北流。經石匣溝。匯爲白鶴灣。又東北會四里河。大砦口西北三里爲攢石崗。北崖篆刻竹谿二字。水西北流。逕竹谿庵南。又西北繞轉山下。匯曲水河。入大汶。案竹谿庵。金黨懷英所居。著竹谿集三十卷。元大德間。教授時王震撰竹谿庵碑。字多漫漶。康熙間於其地立玉帝閣。轉山西爲岫巖山。爲吳山溝。水西南流入大汶。又北三里爲石氏塋域。介自爲墓表。西一里有宋齋書神道碑。已上皆屬徂來之陰。

徂來山南二十里許。爲古南城。晉太傅羊祜封邑。金于城內建大覺禪院。有大定二年勅牒碑。僧福善講法於此。元初僧道慶重建。城西有村曰羊舍。俗以爲羊氏鷺鴨廠也。東北有大家。泰山紀事稱羊續墓。按續墓在新泰境。此不可攷。城東北十里爲岱山城。寰宇記。北齊置。在乾封縣東南六十里。依徂來山。今鎮里村。尙有城堞遺址。又南六里爲宮里鎮。有漢武帝廟。爲漢武東巡駐蹕處。因而立廟。金燬於火。元時重建。又西南有柳里村。卽古柳下地和聖湯沐鄉。巴里北有和聖墓碑。久廢。宮里南三十里爲云云山。培塿

圓伏。史記自無懷氏至周成王禪云者凡九。山上舊有云云亭。西下一石。刻賈氏書院四字。傳爲元賈進士讀書地。失其名。其北有坡曰羽林。村曰甘露。又西爲古柴城。水經注。淄水又西南逕柴縣故城北。地理志曰。太山之屬縣也。世謂之柴汶矣。上接新泰縣龍堂山之水。至鎮里村南。總名小汶。東納濁河泉合流。因名淄水。齊乘云。太山南亦有淄水。卽此。又西過羊祜廳南。又西過龍鄉故城南。而注云云。山東南八十里爲放城鎮。林放故里也。有唐太和殘碑。故相國趙國麟嘗遊徂來山。著記遊。以貧樂巖礫石峪爲最。其形容入妙。固足以輝映前後。然前賢題咏。半沒於瓦礫榛莽間。而名稱多從土人。則攷訂爲難也。甲申暮春之初。余偕友稽訪。杖履殆遍。所經邱壑祠宇。隨筆誌之。未免引證瑣屑。但久幽之蹟。得附泰山而一彰。亦可以遙質相國也。敘識。

泰山西北四十餘里爲靈巖。古稱方山。或曰玉符山。多松柏。齊乘謂之十里松。元八達氏題識曰。巖前松檜時時綠。東晉京兆竺僧朗事佛圖澄。碩學淵通。初止於琨瑞山。降錫焉。嘗往來於此。說法。猛獸歸伏。亂石點頭。靈巖所由名也。屬泰山郡。唐隸齊州。山在縣。尋改爲長清縣。元屬泰安州。後併濟南府。山自泰山踰長城嶺西北。經西棋子嶺。蜿蜒挺特。層崖削壁。而南向。周迴六十里。自泰山後鳥道礫礫難行。登泰山。繼遊靈巖者。由泰安府城西北。遶山西麓。而八九十里。經長清境之灣德村。東北逕鷄鳴山下。有臺有洞。夜半嘗聞鷄鳴。山西巖曰麻衣洞。元李堅棲隱處。東北過大谿。抵雙槐樹。爲八靈巖者。各路之會。由濟南府境東南而入。經靳莊。爲宋靳八公故里。有大書號咷歸別處。結綵便飛雲十字。後書熙慶留題。疑爲呂

仙蹟。勒遲賢亭壁。內設呂仙像。南爲靳八公墓。東南逕塔寶峪。西立石如塔。而中空瑩然。又東跨道爲坊。額曰靈巖勝境。乾隆二十六年建。東南爲黃峴山。有老虎窩。東爲明孔山。其山一孔。南北相通。盤旋北入。內有石佛像。再入一窟。甚深。山巔有靈光亭。圮。東爲滌思峪。又東爲大橫溝。崇興橋。俗呼大石橋。有宋釋仁欽修橋碑。大觀二年郭思撰。王高篆。郭升卿正書。南向。其北面先勒元豐王臨飛白書。靈巖道場四大字。並佳。明嘉靖林瓊撰重修橋碑。又名通靈橋。又東爲小橫溝。明空橋。俗呼小石橋。明時重建。橋東有龜背石。西南爲滴水崖。乾隆二十二年車駕幸靈巖。賜名雨花巖。三大字。及詩一首。又二十七。三十三。六十六。年詩三首。並勒一碑。建亭其地。出上水石。激泥如石。雖小。亦自具邱壑。東南爲凌霄峯。又東爲黃茅岡。爲南谿。東導埜溝。諸水經此。南會憩象泉。而西注。龜背石東爲北谿。卽飲馬溝。李興祖靈巖志稱宋眞宗幸靈巖。曾此飲馬得名。有新石橋。明天啓中釋圓柱建。東納彩泉諸水。經三空橋下。則淤阻。伏流至此。復淤。屈曲西南。黃龍泉水自南來入之。又西過雨花巖。大小橫溝之水。雙抵谷間。流各從北來入之。其下曰滌思峪。又西與南谿交流。匯爲大谿。又西。石隴泉水自南來入之。又西北。注於沙河。卽水經所謂中川也。又西北。過長清城東北。歸大清河。新石橋東爲伽藍殿。有明宏治間僧慧海重修碑。西壁勒宋李堯文題名。西南爲地藏庵。東南爲藥師佛殿。思議佛殿。並圮。又西北。爲方山神祠。壁勒前賢題咏。補書蘇轍詩跋。東旁有豐碑。元文書。訥大書。大靈巖寺四字。北向南。而鐫僧家奴跋。北卽靈巖寺。殿閣層暉。案北魏孝文帝本紀。太和三年起靈泉殿。思遠佛寺於方山。遂屢幸焉。迨正光初。僧法定復興拓建。曰靈巖寺。見宋郭思

石橋記碑。隋文帝本紀。開皇十五年。旅玉符。疑卽此寺。舊趾在甘露泉西。唐貞觀時。徙於西南麓。宋熙寧間。移建於此。仍額靈巖。有勅牒碑。歷代修葺。制加詳焉。大門內三橋相並。中曰聚善。東曰虎谿。西曰接引。明時重建。凡寺內外諸水。皆匯橋下。西注飲馬溝。今廢。二門內碑石林立。其在東者。金明昌周馳撰。田園記碑一。明聖旨碑二。修廟碑二。泰山進香紀碑一。其在西者。宋嘉祐王逵撰。千佛殿碑一。金明昌黨懷英撰。靈巖寺碑一。元聖旨碑三。明聖旨碑三。成化艾俊撰。感應記碑一。東西爲鐘鼓樓。北爲大雄殿。殿七間。祀觀音文殊普賢。案此殿卽宋之獻堂及山門。本無像設。皆明正德間魯藩所增置也。乾隆二十二年。今上賜額曰卓錫名藍。又二十七。三十三。三十六年。御製靈巖寺禮佛詩三首。勒大門外東崖。兩翼齋廡。東爲韋馱殿。西爲觀音堂。由甘露泉遷此。大殿北爲五花閣。上祀三大士。下祀圓通菩薩。閣四面各五間。門四迴廊壯麗。宋嘉祐間僧重淨建。明正德中至珍重修。乾隆十一年。性端重建。西有古檜一株。志稱唐貞觀中。僧陳元裝降錫靈巖。將往西域求經。時有小檜。嘗摩其頂。今幹枯枝茂。石欄護之。有今上御書摩頂松三大字。碑陰勒詩一首。又御製圖詩碑陽勒詩一首。並建亭。其西爲彌勒殿。又西地洞深邃。或曰魯班洞。亦曰巨和洞也。上爲十王殿。大門外有宣和宋齊古施五百羅漢碑。五花閣東北爲駐蹕亭。乾隆二十一年建。卽彌勒殿舊基。內有古柏一株。明王之士碣曰漢柏。周垣勒前人題咏。又東北蒼崖之陽。卓錫泉出焉。世傳爲佛圖澄錫杖卓出者。又名錫杖泉。水西流。匯爲鏡池。澄泓充溢。俗呼功德池。有今上御書卓錫泉三大字。詩二首。勒崖舊有龍王廟。今改卓錫亭。迤東二井相連。碣曰雙鶴泉。齊乘稱立鶴泉也。陳壽愷

云。昔法定建寺。患其無水。雙鶴飛鳴。其下涓涓。果得二泉。今一泉塞。碣亡。鏡池西北爲千佛殿。殿七間。中祀毘盧。漆藤爲之。配以藥師彌陀。範銅爲之。左右小佛千餘。卽唐貞觀中僧慧崇所移建者。宋拓修之。明嘉靖間重建。傳光宅記。萬曆間德濟重修。康熙五十三年僧淨意重修。殿壁前後。勒宋宣和間石刻元蛇兒年國師法旨碑。蒙古字明普大千造像碑。李爰遠造像碑。東北爲御書閣。慧崇建。志稱唐僧陳元奘譯經處。有大觀時仁欽篆書閣額。萬曆間重刊。而志誤爲貞觀御筆閣。壁內外周嵌歷代石刻。如宋蔡卞所書圓通經。尤足貴也。北上有超然亭。圯。今爲方丈禪堂。閣東爲后土殿。宋時重修。有明嘉靖間僧洪寬重修碑。閣西爲般舟殿。法僧祖居重修。周垣內外。皆嵌歷代石刻。西爲辟支塔。塔九級。每級門四。牕六。皆磚石爲之。唐天寶中建。宋嘉祐間重修。元明相繼修之。西偏爲藏經殿。乾隆十四年燬於火。有元張起巖剏建龍藏碑。其後爲倚翠亭。迤西爲和尚林。有唐天寶中慧崇塔及宋元塔銘。西北爲松風閣。稍西爲朝元殿。由甘露泉移此。南下爲關帝廟。后土殿。東爲定公殿。圯。有金陳壽愷撰定公圖序碣。移置大殿西舍壁。明翼城王重修殿碑。踣臥。又北爲玉皇殿。自韋馱殿東爲轉輪藏。德濟嘗修之。嘉靖二十四年重修。任士憑記。萬曆四十四年重修。周萬鎰記。雍正八年僧性端重建。內爲孔雀佛殿。址近改爲公館。東爲達摩殿。由甘露泉移此。自伽藍殿東過仙人巖。爲白衣殿。星月樓及維摩庵。皆圯。庵爲明劉亮采讀書地。號其室曰面壁齋。有題勒而壁。偈圖印泉遺蹟。稍東爲鐵袈裟亭。昔法定時有鐵佛自地涌出。高六尺許。如袈裟披摺之狀。篆書鐵袈裟三字。舊在甘露泉之達摩殿。後置於此。旁有印池。水出函雲洞。繞亭而西注。又北

伏行。會彩泉。上有接引佛殿。圯。東卽彩泉北谿源也。水西流。逕三空橋。而注函雲洞。北爲行宮。乾隆二十一年建。中有愛山樓。御書巡方攬秀額。北崖如屏幃。有仁欽所建抱靈亭。又曰絕景池。西別構觀花亭。對峙。崖之東趾。甘露泉出焉。水西流。繞甘露亭北。又西。過玉河橋下。復北折。入御花園。匯魚池。伏行而南。靈巖第一名泉也。有今上御書甘露泉三大字。勒崖。復摹刻立碑。建亭。又詩四首。並勒碑陰。碑側及額兩面。大門內。池西。舊有石龜泉。涸。其地傳爲金陳壽愷。元杜仁傑舊隱處。卽志所載觀音。朝元。達摩各殿故址。古木參差。多老檀。礪砢臃腫。狀若虬龍。志稱千歲檀也。東北爲小石厂。峭壁平臺。曰可公牀。明釋真可憇此。朗公傳。勒厓側。今上御製登玉符山詩二首。磨勒於上。東爲大石厂。一名半室厓。由小石厂而上。北爲白雲洞。有人今上御書白雲洞額。及題詩四首。並勒洞壁。其旁有駐蹕亭。西過轉山。亦有駐蹕亭。東上有宋政和張勸題靈巖觀音道場六大字。勒北崖。最高處爲懸星巖。俗呼功德頂。石龕宏敞。有釋迦佛像。皆因石爲之。北魏孝文帝本紀。太和三年。於方山起文石室。五年。建永固石室於山上。立碑於石室之庭。八年。幸方山石窟寺。蓋謂此也。龕座刻宋元題名。頂池。西爲拂日巖。頂西北有飲虎池。西北流。中匯方泉。東崖有老佛窩。池水又西。逕積翠巖南。又西南流。小橫溝源也。佛日巖南爲巢鶴巖。昔有雙鶴止此。直接石坪。幽曠坦豁。俗謂之晒經臺。有今上御書巢鶴巖三大字。及詩四首。並勒一碑。建亭。前爲蹲獅巖。或曰盤石也。東谷口有雲窩。又南懸崖有觀音洞。三門相通。內有石佛像。東南多宋人題名。勒崖。有坦地約三畝。不生草木。曰無生地。佛家以無生爲上乘。故云。西爲香霏巖。俗呼繡毬山。自慧崇塔西北里許。北峪之水。



南流。經朝元洞。圓光洞。東而注大橫溝源也。自白雲洞南三里爲石尾峯。南爲靈關峯。峽通一線。卽小天門。東二里有華巖泉。水北流入黃家峪。西折注於中川。北爲華巖寺。圯。北五里爲野老村。東晉中山張忠。舊隱處。靈關峯南爲朗公山。西巖有朗公石。狀如老僧偃立。迤南爲九曲峪。朗公砦。朗公泉。水北流。東折南下三里。注靈帶河。朗公石西南爲如來頂。快活巖。臥象嶺。又南爲珠山。有堃溝。會納支水。南谿源也。又東。雙峯皆圓特。俗稱東西磨山。中夾蘆溝。水東流。南折會棋子嶺。西曲溝水。曰三叉口。又西至武家村。南。北接靈帶河水。南接紅蒿峪水。匯爲合一河。又河過長城鋪。北注於中川。北峪之北有石厂。中一窟如井。西北二里有神寶泉。下爲瀆米峪。水北流。西折入於中川。上爲神寶寺。北魏正光初。僧法定。創建。今廢。有斷碑。篆額曰大唐齊州神寶寺之碑。開元廿四年十月日子。襄。兼八分書。碑側鐫行書心經最古。殘缺。書人姓名。稍東。有元大德十年聖旨碑。北爲寶山上。立玉皇廟。有明嘉靖高奎撰重修碑。東曰神谷。北二里爲黃尖山。兩崖對峙。俗呼梯子崖。崖上南北兩山相連。曰雙峯。其陽石竅蓄水。甘美充溢。謂之醴泌泉。過其西。折而東北。爲石鵞峪。幽厂尤奇。如巢嶼。或稱栖佛洞。殆盡矣。

泰山東北四十餘里。爲琨瑞山。一名金輿山。輿或作榆。又名崑崙山。崑訛作崙。又名金廬山。攷酉陽雜俎。當名金驢山。東有金驢洞。志稱黑風洞。齊乘稱西龍洞山。酈道元云。苻秦時竺僧朗居之。因號朗公谷。舊名琨瑞谿。山勢秀拔。雙流如帶。面西南向。周六十里。自泰安府城東北踰長城嶺。經玉皇嶺。至百餘里。自歷城縣東南經柳埠村。至八十五里。山西北爲神通寺。道元云。竺僧朗大起殿舍。舊稱朗公寺。隋開皇三

年文帝以通微屢感故曰神通也。其制門閣兩重。北爲大雄殿。東曰伽藍殿。西曰達摩殿。有元至治邢天祐興公道德碑。明宏治張天瑞重修寺碑。北爲千佛殿。圯。有元大德智京雲公碑。明成化僧太初寺外護碑。嘉靖重修千佛殿碑。北爲方丈。東爲禪堂。又北爲法堂。兩翼齋廊。齊乘云。神通寺有汝泉。案歷城縣志。寺內本無泉。惟方丈西有白龍池。或卽汝泉與。然又塞於僧舍下。東廊下有朗公時所浚神異井。湫。寺西地敞豁。舊有藏經堂。轉輪藏。鐘鼓樓。圯。又南一臺有四門塔。極崇麗。皆石爲之。塔前古柏一株。九頂蒼秀。傳云漢植。其東有宋三壇寺窰塔波。因石鑿成。紹聖間潘卞爲撰銘。又東有染地龍洞泉。洞門半掩。石龍半露。水自中出。經青龍岡。通聖橋。西注玉水。有嘉靖金城撰重修橋碑。寺西北隅。地勢幽曠。中曰朗公塔。制最古。餘多元時篆書塔銘。又西爲千佛巖。峭崖絕壁。有大小石佛千龕。多魏齊及唐人所鑄。猶有造像記二十餘可識。又西北爲黑風砦。地危峻。昔人嘗避亂於此。爲紅鶴崖。石壁淩雲。洞心駭目。大觀也。又西北爲季兒砦。泉子峪。爲青牛砦。通天峪。巨石懸臥如梁。曰仙人橋。青龍岡東三里有海螺峪。匯錫杖泉。西南注於玉水泉。側有須彌塔。宋宣和間建。劉宗等題名。東南三十里爲長城嶺。嶺南北水皆分流。西陽雜俎謂之分流山。迤北爲梯子山。谷水更多。東有仙人洞。雲梯澗。西爲仙龍潭。玉水源也。玉水以玉符山得名。見水經及注。歷城志稱錦陽川納諸水。秀迤西北流。左會礦洞溝水。又西北。經桃科額。東。左會枯泉之水。又西北。逕平頭山。東平頭。迤東爲龍集山。上有玉泉寺。下爲風門嶺。爲劈山。又西北。左會龍門峪水。又西北。逕齊王砦南。又西。逕琨瑞山南。曰琨瑞谿。梯子山。西爲天麻峯。獨孤泉。北流。又西。爲松峯。下有龍池。

亦玉水發源處。水西北流經窩鋪峪。有永興觀。又北過雙鎖山紅山口。西右會三岔水。又西過金驢山南。又北與琨瑞谿合流。總名玉水也。左會涌泉之水。有涌泉橋。明萬曆間建。郭邦雲記。西偏爲涌泉庵。隋開皇時重修。明嘉靖間重修。段雄記。玉水又西經屏風山南。有黃巢洞。爲盤磴所掩。上立天齊廟。有明宏治韓相撰重修碑。又西逕柳埠村南。中有紫微觀。圮。松峯西北爲交戰峯。山勢突兀。頂有數穴。深不測。曰雲洞。東爲陡峪。多丹楓樹。西爲雲谷。下有響泉。又西北爲旣洪峪。中有苦苣泉。爲苦洪峪琴泉。齊乘謂泉甲天下。韻琴筑而味肪醴是也。又西北逕靈鷲山西。有九塔寺。塔九頂。唐天寶大曆間重修。內有觀音殿。明正德間重修。馬雄記。嘉靖間重修。許邦才記。碑具在。門外有聖水泉。又北逕回龍山西。長城嶺北爲鞦韆臺。山高陰寒。多積水。曰冰臺。經夏始解。又名冰泉。北經龍峽。入印度泉鞦韆臺。西爲玉泉嶺。下有蔚溝臺。迤北爲瓦子嶺。遍山皆瓦礫。志稱爲秦皇行在也。又北爲齊城峪。茶白河出焉。中有試茶泉。懸流飛瀉。經康泉。右會勺泉。峪水又北過白石崖。西左會避暑泉水。又東北逕虎頭崖。西右會段華泉水。入於玉水。瓦子嶺西爲黎峪。有潮音洞。上接印度泉水。經閻家河北流。右會石灰溝水。又東北右會礫池水。又北經三角洞。東又北右會石厂谷水。又北經青岡嶺。東入於玉水。玉水又西經柏崖。北有透明洞。下爲柏水灣。又西左會欄石峪水。又西經扶山。北有子房洞。深里許。地河伏流。洞旁爲五帝閣。東五里有子房庵。金天眷時碑。熨斗泉。東北流。北六里有都泉。爲岱北諸泉之總。舊立黃姑庵於上。石塔有開元字。水西注會水簾泉。又西一里。逕三尖峯南。峯之西曰木梨砦。曰龍洞峪。玉水又西北經總度口。南接錦雲川。合流。一名南


川發源于玉皇嶺之蔚溝。西南爲拔山。爲五女石山。溝水西北流。經東南棋子二嶺中峽。會西棋子嶺水。曰出山溝。又名出泉溝。達于黑山砦。北有下安寺故址。屈從東北流。左會百花泉水。又北。左會雙泉水。又西北。經楊廣砦東。又北爲魏花砦。宋指揮魏花故居也。楊廣砦西爲火焰山。爲天麻砦。中夾道溝峪。北爲圓通山。有普門寺。元時建。成化崇禎間重修。門外有聖水池。旁爲雲水庵。圯。又北爲方山砦。有白雲寺。又北爲九女砦。三石削立。宛如三婦。並在雲中。又名三媳婦砦。北爲澇泉峪。嶺爲澇泉峪。嶺西爲隱士峪。有葫蘆崖。中爲法雲寺。唐永徽初建。久廢。玉水又西。逕中宮鎮南。齊乘稱中宮東有懸泉。柳泉。車泉。皆入玉水。北醴泉寺。一名四合。元至正間重修。玉水又西。逕中宮鎮南。齊乘稱中宮東有懸泉。柳泉。車泉。皆入玉水。北接錦繡川合流。一名北川。發源於梯子山雲梯澗。西北流。左會紅泉峪水。又北。右會石隴峪水。又東北。左會燕脂泉水。又東北。右會藕池水。又北。經黃樞泉禽寇峪。會雲河水。又北。經皇砦南。右會天井峪水。又西。爲大澗嶺。有龍灣水。西南流。又西。經桃花嶺。南有桃源洞。右會大黑谷水。又北。經青石崖東。又北。左會白雲泉水。又西。經林泉觀南。又西。經琨瑞山北。左會荻子峪水。有朱老庵。又西。左會馬蹄峪水。有華巖寺。元時建。又西北。經香孤山南。又西。經大佛寺。會寶姑泉水。又西南。左會稻池水。玉水又西北。經月牙嶺北。又西北。逕罈口嶺北。又西北。逕臥虎山南。又西北。逕黃山北。山周如城。疑卽水經注之玉符山也。以錦陽川所經。故又曰玉水。齊乘云。靈巖與方山相連。疑卽玉符山。案靈巖前後之水。源流與朗公谷水無異。則非玉符可知矣。今皆以靈巖爲玉符山。蓋因齊乘而誤。又西北至渴馬崖南。則汨然而止。湫流而東。發趺突。

泉又北曰灤水。又東曰小清。然西北流者。至長清縣之概山北復見。又西北逕獵山北。又西北經齊河縣界。入大清河。水經謂之濟水會歸矣。

泰山界齊魯間。昉于管子。孔子登泰山小天下。盡于孟子。後世著述不一。是編恐未悉合。偶讀靈巖志。歎其雄勝奇巧。然皆泰山也。故王元美曰。靈巖是泰山背最幽絕處。遊泰山不遊靈巖。不成遊也。案靈巖在泰山西北。至水經注瑤瑞山之朗公谷。在泰山東北。猶兩背。然或謂朗公谷屬靈巖者。誤。而岱史諸書。姑置弗載。致泰山全體不備。非例也。歲乙酉夏。余迺遊靈巖。探瑤瑞。蒐訪名蹟。據三川。辨玉水。履勘源流。附錄之以補言泰山者之闕略云。余又謂山水從金石中見。金石自山水中來。今是編既出。猶有泰山金石攷六卷。凡歷代遺蹟。碑制方向。及間有斷缺者。須分別存佚。各爲跋語。剖析以注之。恭紀國朝東巡金石錄爲卷首。竊附泰山道里記于卷末。是山水與金石所宜並著者也。歎流光之迅速。嗟老眼之昏華。未可矯強。姑存虛志。癸巳春。有上元嚴侍讀先生。雅好登臨。廣蒐金石。因纂泰山志。過訪泰山道里記及泰山金石攷諸書。披閱攜歸。迺別爲金石類籤一書。而泰山金石并隨意采入。豈非時數使然哉。噫。金石也。山水也。同余夙癖。爲不徒矣。欽又識。

泰山掌故。古有泰山記。其亡已久。至明始有泰山志。爲吳百朋所輯。後查志隆易名岱史。歷城劉勅增修之。其書分類雜陳。率多掛漏。未稱完善。吾叔祖劍光性嗜山水。遍覽名勝。蒐討金石之文。閱三十年。成一書。名曰泰山道里記。凡諸記載所未言。而尤當特書者。如石經峪刻金剛經。據徂來刻石。辨爲北齊王冠。

軍書。唐紀泰山銘下截剝落。葉彬補書百八字。宋述功德銘磨勒岱巔。鏡毀原碑字猶存。介邱巖分水谿。及古明堂均失覈蓄疑。又肅然山奉高城季札子墓與白驪冢俱誤指其地。汶泮三谿諸水皆牽混源流。昏背琨瑞靈巖諸山因隸他縣而未錄。叔祖遂加考驗。折衷羣書。辨訛補闕。徵信確鑿。以路爲綱。殊簡括有法。彙成見示。讀之而有歎焉。蓋叔祖嘗留心經世之學。今且終老鄉里。杖履徧山谷。僅借此消歲月。以娛其志。而年已逾五十矣。書之傳不傳。非所計也。乾隆丙戌正月既望學文敬跋。



廿八年五月十九日  
該書店

編主五僕王

編初成集書叢

記里道山泰

中華民國二十六年六月初版

纂者 聶 欽

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

\*E五二七二

朱



3

4

3002